


Chikolo Cha Chindende

 Ngwasakwila, Ndumbu walunga Neville. Ngwasakwila. Echi chili chamwaza kukinduluka Muzuvo ya Mwata. Ngweji kwivwanga lwola lwosena kuwaha hakukinduluka kumbalaka, chipwethutu kwosena Ngweji kuyanga. Kuli chuma chimwe hano hachihela chamwaka chize cheji kungulingisanga Yami kukinduluka kuno. Chili kaha, mamalelo, Nguli... Eli yapwile liuka lyami lyatete Ngwafungilenga. Kaha echi chili chamwaza kukinduluka cheka kuno. Kaha Ngwafwelela chize chimene chachinene omwo likumbi nalikakana kumunyika na va tanganyika kufuvalala mukumunyika chavo, Ngwafwelela kuze nakuya kukapwa vamwe kufuma muli ino mbalaka navakapwako mulize likumbi, vaze vakukosa na Manyinga amwana Mukoko. Nguli nakutalilila luze lwola.

² Nge omu Nguli nakuhita muno kapeka hano vene, Ngwaliwananga na Ndumbu wapwavo Arganbright kuze kunyima. Kaha ikiye apwanga nakungulweka yami nge kwapwanga vathu vamwe hano vapwanga kukuliwana cha Kingston, vaze vayile kuze luze lwola, kaha Ngwa... vene... wakuwahilila chikuma hakupwa navo kuno kupwa unjiho. Kwosena okwo vakiko vapwile, kachi vakiko navaya nakupwa namavoko avo hamwe, kwapwile kukuliwana cha Kingston mu Jamaica. Kupwa kaha, yaah, kunyima kuze kunyima. Chosena chakwoloka, chize chili chamwaza.

³ Ngwamono makati a Oral. Ngwashinganyeka enu munavilika kuliwana chenye. Ngwahonene kutachikiza palanga, makumbi akakweji, palanga zau. Ngwashinganyeka chinaputukila ha sikisi, keshi ngochoko? Sikisi na kutwala ku fifiteni, Ndumbu walunga Roberts mu Louisville. Jino, yako mukamwivwe. Ndumbu walunga Roberts apwa kaha—kaha sepa lyami wahamuchima, kaha ngamba ya Kulishitu wamwenenemwene. Kaha Ngunakunyuka vene nge namuya nakusuwuluka na mijimbu yenye, ufuku ha ufuku. Kaha... yenye, omwo ikiye mwalombelela va kakuviza, Yami—Yami ngwakunyuka nge namuya na kumona Kalunga kutambuka, mwomwo ikiye apwa chingazule wamunene wa lufwelelo, Ndumbu walunga Roberts, kaha lunga uze Kalunga ali nakuzachisa muundume. Kaha mulimo wenye wanyinyi kufuma...

⁴ Ngunanuka omwo Ngwaliwanyine na Ndumbu walunga Roberts, ikiye apwile mukambalaka kakandende kakutanyuka muze mu St. Louis, Missouri, kaha Ngwapwile... nduma, mu Mbongi ya Kansas, Missouri. Kaha Ngwapwile mu Mbongi ya Kansas, mu zuvo yayinene. Ikiye atwamine muchitwamo cha kulutwe. Hakukumisa kutanga, etu twayile twajingulukile

kunyima kaha twashimutwile. Vakiko vangujimbwile yami kuli ikiye. Ikiye kanyike hali Yami; Oral apwile muma fwote. Kaha shikaho ikiye ngwenyi, “Ove unashinganyeka nge Kalunga mwevwa kulomba chami hali vakakuviza?”

Ngwambile ngwami, “Ndumbu walunga, Ikiye mwevwa kulomba chakala muthu chize mwalomba.” Chamwaza, ikiye aputukile kuya, kaha ikiye ngwenyi, “Hano jino Ngunayi!”

⁵ Kaha ikiye apwa lunga wautongwe, kaha wakatanga kuchikola yayinene, mwaka yimwana ya kulinangula mwakutangila muthu, kaha Ngunakunyuka ikiye ali—ikiye ali lunga wamangana. Kaha ikiye ali na chihela jino nalizavu lya vakakumukafwako vanamujinguluka ikiye, na vyuma vimwe, palanga, omwo ikiye mwahanjika, ikiye—ikiye eji kushinganyeka. Kaha ove nauya nakuwahilila na ikiye, Ngwakunyuka vene.

⁶ Kaha shikaho jino Ngunatondo kuhana mujimbu waundende ha chuma kana Mwata nalingi mukuliwana chetu chakulikehesa chachindende mu Jamaica na mu Puerto Rico. Kwapwile chuma chaungeji chize Ngwahichilemo, mwomwo kusanyika chachivulu chejile. Nge omwo Leo hano natachikiza, nge shinga... Nakuhita mukachi kamulungu, kuli vihela vyakuheta ku handulendi vapwile na kusanyika kukunguluka. Oloze Nguli na kwivwa kutwaminyina okwo Ngunahase kuya, hali chize. Kachi nge Nanguya mwomwo ou lunga angutuminyine mangana ngwizenga, kaha jino Nguneza mulijina lya lize liuka mokomoko lya lize chikungulwilo. Kachi nge Nanguya mwomwo Ndumbu walunga Neville ngwenyi Ngwatela kuya, Ngwatela kuya mulijina lya Ndumbu walunga Neville. Oloze Ngwazanga kuya Yesu nangutumu, shikaho ove yako mu Lijina lya Mwata Yesu, kuliwana na vathu.

⁷ Kaha Ngwapwile na kusavala ha Kahela, kaha Ngunapunga na kuzeya chachindende. Echi chinema, kalinwaha mokomoko kulutwae, ngwatela kuseza chino chinema, mwomwo echi chili kaha kuhokola muliwu kuheta na kuchihela Kangweshi kuhasa kwimanako kuli echi. Ngunahase kupwa kweka kaha kunyima...Etu twezenga likumbi likwavo, Leo na Yami, mukachi ka fwote milosi, hanyima ya kupwa muvijiva vya mu Florida, hamuliwu hosena hanatome, kaha mukachi ka fwote milosi kutwala Louisville kaha yechele cheka. Ndumbu walunga Banks Wood atela kupwa hano kumwe chino chimene. Kaha likumbi likwavo kwiza kufuma ku Kingston na—na Puerto Rico, kuze muliwu wami unapunga kanawa; kaha Ngwayile mundeke, chochimwe ufuku wosena; kaha shimbu kanda tuhete ku Jeffersonville, walisokele cheka. Talenu, echi chenema hano. Vali tututu vali mupeho, mokomoko ali Kalunga, umwe, kweseka kungufumisako. Shikaho, Ngwa—Ngwahono kutachikiza echi. Ngwalombo na kumuhula lwola lwaluvulu.

⁸ Oloze, chipwe ngocho, Ngwahindikanga kaha, lwapwanga lwola lwa ma sili kuloku ya muchimene. Kaha pwevo lyami na kanyike walunga wamundende vapwile vanasavala. Kaha Ngwahindikile kusali ya kahela, kaha Ngwamwene lizavu lyalinene lya vathu vana kunguluka ha chihela chachinene, kaha Ngwambile kuli Billy Paul, “Ove yako muze na kuhana vase vathu makati akulombelela.”

⁹ Kaha ikiye ngwenyi, “Eyo, tata.” Mu muminyutu yayindende ikiye akindulukile, kaha ngwenyi, “Ove kaweshi kuhasa kuhana aze makati kuli vase vathu ko.” Ikiye ngwenyi, “Ove unamono ou muthu nemana hano?”

Ngwambile ngwami, “Eyo.”

¹⁰ Ikiye ngwenyi, “Ikiye apwile hano, kaha Ngwambile ngwami, ‘Muthuwosena natondo kati yakulombela, zundula livoko lyove.’” Kaha ngwenyi, “Ngwayile nakumuhana ikiye kati yakulombelela, ikiye ayile kumwe. Kaha jino Ngwayile kuze, kaha ikiye apwile kumwe kuze. Jino ikiye apwile kuze kunyima kuze.” Ngwenyi, “Ngunahono numba kuhana numba kati imwe.”

¹¹ Ngwambile ngwami, “Chamwaza, Billy, ove kaweshi kuhasa kuhana makati akulombelela ko, mwomwo kuli chihela chachinene hano palanga muthu wosena nahase. . .” Makati akulombelela eji kuhonesanga chizungozungo. . . unatachikiza, na kuvahaka muchiyulo. Ngwambile ngwami, “Mamalelo, Ngwahase kumbata muthu wosena ko, kuhambakana chihela chinahashila echi Nguli nacho, kaha nakuvahaka mumukana na kuvalombelela umwe na umwe.”

¹² Kaha ikiye ngwenyi, “Chosena chakwoloka.” Kaha ikiye alumukilile kuchilyo na kuya nakufuma kuli yami. Kaha Ngwalumukile nakujuinguluka kuli *eyi* jila omwo apwile na kuya mujila *kana*, kaha ngwapwile nakumutala ikiye.

¹³ Kaha Ngwevwile Lizu kusuluka kufuma Mwilu, kaha ngwalyo, “Oloze ha lwola luno Nanguya nakuputuka kukutohwesa ove.” Kaha Ngwatalile, kaha kanda lyehi Ngumone lizavu lya vathu, vakiko vapwile na kuunga kufuma kwosena.

¹⁴ Kaha Ndumbu walunga Roberts lijina lyenyi valisanyikile, ngwalyo, “Jino Ndumbu walunga Oral Robert ali nakwiza nakukumona.”

Kaha Ngwambile ngwami, “Kaha Nangumumeneka ngachilihi Ndumbu walunga Roberts?”

Ngwenyi, “Mwomumwe muze eji kukumenekanga ove.”

¹⁵ Chamwaza, Ngwamwene Ndumbu walunga Roberts kwiza navwale suti yilava, na kalitepa kakandende nge kuvwala cha Bing Crosby, tuze twatundende tuli nakwalumuka helu nahamavu, nakalitepa kakandende kalava. Kaha Ngwapwile

Ngunemana nge ngana, kaha ikiye atalile helu kaha ngwenyi, “Halo, Ndumbu walunga Branham.”

Kaha Ngwambile ngwami, “Halo, Ndumbu walunga Roberts,” twalimenekele.

Ngwenyi, “Ove uli na lizavu lya mwaza.”

¹⁶ Ngwambile ngwami, “Lizavu kana, Ndumbu walunga Roberts.” Kaha ikiye alumukile na kuya mujila nge muze alingile Billy, kuchimoswe.

¹⁷ Kaha Ngwashingtonyekele, “Kulihi Nanguyila na kuhanjikila kulihi?” Kaha Ngwesekele kwosena nguwane chihela okwo nanguhanjikila. Ngwapwile muukalu kana, chuma chimwe hamavu, chize Ngwahonene kumona okwo kwa—kwa kuhanjikila navakiko.

Kaha muthu umwe ngwenyi, “Chamwaza, twaya kuno.”

¹⁸ Ngwambile ngwami, “Chwamwaza, ove kawamonanga kanawako kuze.” Kaha Ngwaputukile kuzawuka chize chihela. Kaha Ngwanukile echi jino, Ngwambile ngwami, “Chuma chivene echi yami ngwatela kulinga shina kupwa wakulinyisa mumuchima wami, lwolalwosena, kumeso a Kalunga na vana Venyi.”

¹⁹ Kaha Ngwafumine muze muchimweno. Kaha Ngwashingtonyekele, “Echi chalumbunukila mulihi? Pamo echi chalumbunukila etu tuli nakuya nakupwa na...Mokomoko kulihi—kulihi echi nachiya nakupwila?” Enu mwamono, lwolalumwe, mu vimweno, Ikiye keshi kuhasa kukulweka ove kulihize, Ikiye—Ikiye eji kaha kuhanjika kaha ove naupwa kaha...Chili mu chishimo, kaha. Kaha Ngwakunyuka enu mweji kutanganga Mbimbiliya mwevwishisa echi.

²⁰ Kaha jino Ngwayile kulutwe lwa uze kapete na kutwama ha katando kakandende, kaha lwapwile pamo mu sili mokomoko fwo koloko ya chimene. Ngwasavalilemo. Ngwakindulukile na kusavala, kaha Ngwalotele chilota, kaha chapwile chachipi. Kaha enu vavavulu munatachikiza umwe hali vaze vafumbelo, Jack Moore. Ndumbu walunga Jack Moore, Ngunamutachikiza ikiye mummyaka yayivulu. Ngwashingtonyekele nge Ngwayile na muusendo na mwanenyi wapwevo, kanyike wapwevo wamyaka seveteni yakusemuka, kaha amumbachilelenga kulivoko, kumutwaminyina nakukanduka kupili, Jackie wamundende. Chamwaza, Ngwamatachikijile kufuma vene haze apwile kemba wakulivele. Kaha Ngwapwilenga nakumutwaminyina nakukanduka kupili, kaha Ngwayile helu lwa kumbakana jimbango ja zuvo ja mumbongi helu hapili, kutwaminyina uze kanyike wapwevo. Kaha etu twejile mwishi ya mutondo waunene, kaha ikiye atwamine. Kaha nge omwo vapwa vanyike vwapwevo lelo veji kuvwala vize vifunga, munatachikiza, akujimba, kaha ikiye apwile vize vifunga kana. Kaha ikiye ambachile chize chifunga chachindende nakuchala kaha

nakutwamaho. Kaha nge vanyike vavandende kutala hali umwe na mukwavo, ikiye avungile mavoko enyi *ngana* nakuputuka kutala helu muutangatanga. Chamwaza, Jackie apwa kanyike wapwevo wamwaza, oloze ikiye atwama na kanwa kakanene na meso amanene, kaha jikambu ja jjisuku jakulijingajinga, keshi jakulukwisako, oloze kanyike wapwevo wamwaza. Kaha Ngwamwene meso enyi amanene omwo atalile muutangatanga, kaha omwo kumunyika chautangatanga chapwile ha meso eyi.

21 Chamwaza, Ngwayile pamo faifi feti kufuma hali ikiye, kaha nge ngwasavalile kusali ikwavo nge *ngana*, kaha ngwapwile nachiswaswa kaha ngwachihakile mukanwa kami, kaha ngwaputukile kuchajakuta. Kaha Ngwaputukile kushinganyeka, “Kaha Nanguya nakulinga ika hano? Mwomwoika, yami ngulunga wakukola, na ou kanyike wapwevo. Mwomwoika,” Ngwambile ngwami, “Ngwambata na mukuta wavana. Kangweshi na mulimo hano na ou kanyike wapwevo ko.”

22 Kaha Ngwaputukile kukatuka. Kaha, omwo Ngwalingile ngocho, Lizu lyejile kufuma mumutondo, kaha ngwenyi, “Echi chinapu chinjikizo kaha chili na mulonga umwe.”

23 Kaha Ngwahindikile nakukatuka, kaha ngwatetele, nge—nge chivanguvangu. Ngwashinganyekele, “Mamalelo, kuhona kutachikiza nge Yami nanguya nakuholoka mokomoko chuma chimwe kusoloka kuli yami?” Chamwaza, Ngwashinganyekele, “Kachi Nanguya na kweseka kuzachisa wongo wami, kahajino Nanguya nakuvifutakana, shikaho Nanguya nakuvandamina hali Kalunga.” Kaha Ngwaputukile kulomba. Ngwambile ngwami, “Mwata, echi chilota chanapandama kuli chize chimweno chize cha kuze kukuputuka cha ufuku, mokomoko echi chinatwale mulihi?”

24 Hanyima yakuvandamina lwola lumwe, pamo muola yimwe (Pwevo lyami tele ikiye nahinduka lyehi nawahisa lyehi kulya chachimene.), kahajino Lizu lyejile cheka, kaha ngwalyo, “Yako ku Kingston, kaha navakakulweka ove ovyo watela kulinga.”

25 Shikaho, hazevene Ngwayile ku Kingston. Kaha vakiko—vakiko vatachikijile nge musana wamu Chiwana nge Nangukapwa kuze muchitanu. Mukiko mwapwile vavilikile. Yami kangweshi wamwaza kulaviliza...?..mokomoko kufwanyisa lizavu, mwomwo Ngweji kuhambakanyisa. Oloze ufuku watete, Nangwamba ngwami twapwile pamo twolufu, mamalelo, pamo twolufu handulendi ya vathu, kuze, mwomwo yapwile ya likumbi limwe. Kaha likumbi likwavo vakiko vaze vakakulaha kulaha fwo milosi, kujinguluka, jize jipili. Umwe mukakulaha alahile mujiola ja fwo, kaha jino kwecha vakwavo vakakulaha kujinguluka pili. Kaha ufuku wamuchivali kwapwile pamo faifi sauzande. Kaha ufuku wamutatu vafwanyishile kupwa pamo fifiteni sauzande, pamo twende. Kaha kwapwile kapapa sauzande kwiza kuli Mwata.

²⁶ Kaha chimweno chapwile, liuka lyalindende, kanyike wapwevo kanda alimone namone na lunga, apwile namwana, kaha chize chapwile usanda waliuka. Kaha jize jimbango jitatu ja mbongi helu haze hapili, apwile makumbi atatu Ngwatangishile. Kaha kumbata liuka lya usanda na mulimo wami, kufuma kuze apwile, helu muvyuma vya Kalunga, palanga nomu yayikishile yize ngalila yosena.

²⁷ Kaha, mamalelo, vakakuzata na vathu vapwileko, kulila na kulambilila na kushijila, “Ufuku kaha mokomoko uvali,” vakulwane vamuze mumbongi.

²⁸ Etu twafumine kuze nakuya ku Puerto Rico. Kuze etu vatusambilile na lizavu lyanene, vakufungulula, na masauzande na masauzande vapwile kuze, palanga nomu vakopasanyine nge kupwa fwote sauzande myono yamwaza yejile kuli Mwata Yesu. Kaha ha kuya, Ngwafwelela Nangu...Nanguhanjika echi kupwa kuliuka lyami, oloze Kangwahashile kuchilinga kulivathu kalako, kuze kakweshi mazuvo masepako, mwomwo vanahase kuchimona nge chakuhenga. Oloze Ngukwechi lijina lyamukakusopesa hano hachihanda cha lipapilo, uze ahanjikile omwo etu twapwile nakuvaseza, haze vene, ikiye na mukana wenyi.

²⁹ Kaha Ngwa...Ikiye—ikiye ngwenyi, “Etu tunapunga vakuvumbika mulize lifuchi kupwa navakuzata vakulisezaseza.” Ikiye ngwenyi, “Omwo Mukulwane Billy Graham kalinwaha nafumu muno mulitungu,” kaha ngwenyi, “etu twapwile na—na kuliwana cha upahu,” Ikiye ngwenyi, “oloze Billy Graham atunehelile Mujimbu wamwaza woumwe nge ou tunevu lyehi.” Ikiye ngwenyi, “Kahajino etu vanatuvumbika hakupwa na Mukulwane Roberts muno mulitungu,” ikiye ngwenyi, “kaha Mukulwane Roberts atuhananga kuliwana chachinene cha makumbi atatu. Oloze,” ngwenyi, “kaha ndando yapwanga yainene muze muzuvo yavangeji,” ngwenyi, “asele seti faifi sauzande ndola yamali haufuku utatu, ndando ya kuzuvo vangeji.” Ikiye ngwenyi, “Kahajino Mukulwane Osborn apwile hano, uze apwile ngamba ya Kulishitu wamunene. Oloze,” ngwenyi, “omwo Mukulwane Osborn ayile, kuze kwapwile kushikumuka,” ngwenyi, “echi chasolokele nge vyuma vyosena vinayi.”

³⁰ “Oloze,” ngwenyi, “etu twamwene muli echi kuliwana nge kuze kakwapwile numba umweko ha kamenga ka Ndumbu walunga Branham kumulombelela. Oloze,” ngwenyi, “hanyima yakutanga echi kutangisa, etu twambachile motako yayinene ya vitwamo vyamwaka na mauka na vyuma vyosena, kulovoka mulizavu.” Ikiye ngwenyi, “Echi kacheshi cha muthu lwola luno, Kalunga ejile kuli etu,” ikiye ngwenyi.

³¹ Ngwambile ngwami, “Kanda kuvandamina kulomba chami; oloze malombo enu kuze, haka livoko haliumwe na

mukwavo.” Kaha vakiko pamo navaneha mukuta mokomoko vavali ha kamenga, kaha, omwo kutumbununa chejile, vathu vatetumukile. Etu twatwamine mu zuvo yavangeji yaseteko yamuchiwana, kaha twafwetele ndando yetu yosena na kala jila, etuvavene.

³² Enu mwakafwile hakulinga ngocho, enu vavene, na chamulikumi chenu chize mwangutuminyine. Chize chikiko chalingile echi. Kaha Ngwatondo enu kutachikiza echi, mukufma muli chize, enu nenu mulimo na chihanda. Kaha mu likumbi lya upahu lyalinene kwiza, Kalunga mwakamifweta enu. Talenu, enu kamwapwile na . . .

³³ Kachi muthu lyavene mwaya na kuzata chumachimwe, kahajino, enu mwamono, omwo uze muthu mwaseza nakuya, vakiko veji kushinganyeka, “Kwapwile kushikumuka chivene, Kalunga atu sele.” Kalunga keshi kumisezako. Ikiye ali nayenu lwola lwosena. Talenu, ove kaha kupwamo chikuma muli chize, nge kala muthu. Kalunga nahase kuzachisa muthu ha mulimo umwe, oloze chize kachalumbunukile nge uze muthu ali na ngolo hali Kalunga ko. Chinapu lufwelelo lwove na Kalunga.

³⁴ Kaha vakiko vayile muze muliwilo lya chimbulu, muze vakiko liwilo kemba lya chimbulu, kaha—kaha kupanga litemba, kaha na kusavalika vathu na kuvatambukisa muze. Kaha hanyima ya kutanga, mwakulahila mupwenga mutoma, vakiko navaya na matemba na mingweji na tumatemba twamwaka na chitwamo chachinene chamwaka, na mazavu na jikochi na tuhela, kaha haze vene vakiko vatambukile nakuya na kuvaseza, mwomwo Kusoloka cha Mwata chapwile kuze. Omu mukiko etu tunatondo kumona. Muthu kufuma na muchimweno, Kalunga apwile nakutambuka.

³⁵ Kwiza cheka, kukafwa jino chino chimene, Nanguya nakuhanjika muminyutu yayindende. Kaha Ngwahulile vase vanyike vamaalunga mangana valovole ize tepu. Makumbi atatu Ngwesekele kushinganyeka chikuma, “Na Nguya nakuhanjika ika?” Kaha chino chimene, shimbu kanda Ngufumeko, Ngwevwile kuhuhumuna chachinene mumuchima wami chalize liuka. Kaha Ngwawalwekele vakiko, “Mbata eyi tepu, oloze kanda kuwalovola apwenga akulanjisako.”

³⁶ Oloze shimbu kanda etu tulinge evi, Ngwatondo kumihana enu unjiho waundende, uze unahase kumiwahisa enu. Wanguwahishile yami. Etu twayile mumakumbi atatu ungeji wakuta ishi, Leo na Gene na yami lyavene, kaha mwanami walunga Billy Paul na pwevo lyenyi, kuya kuze kulisepa uze eji kwiza kuno ku mbalaka, kufuma kuze ku Georgia. Kaha vakiko vatumbachile nakuya kunyima ya chijiva, Ngwahono kutachikiza kuze chapwilenga jino, kwakamwihi na Okeechobee mokomoko chuma chimwe nge ngachize, Ngwahono kutachikiza

lijina lize vase va Seminole vaku India valihana. Oloze, chipwengocho, etu twapwile kunyima na jimilosu jajivulu.

³⁷ Kaha ou Ndumbu walunga Evans, ndumbwenyi walunga apwile mukashili. Kaha ikiye apwile mukakuta ishi wamunene, kaha ikiye ayile cheka muze muchijiva hanyima ya tukweji vavandende hanyima. Kaha vakiko vapwile navize veji kusanyikanga ngwavo “mbanda jila.” Kaha uze mbanda jila amusumine, kaha ikiye katelele kuyako. Lihinji lyenyi lyajimbile, kaha vakiko vamutwalile kuli ndotolo kaha vamutuvile jindongo. Vaze voma kufwavo. Kaha mukiko mwapwilenga na milalu nawa, milalu, ngambu, vangandu vakusuhwa kuheta kutwende fiti.

³⁸ Kaha shimbu etu twapwile nakufuta kunyima kuze, Ngwakwachile chizovolela wamunene. Mamalelo, lyapwile likumbi lyamwaza lya—lya kunoka. Kaha ikiye apwile wamunene chikuma Ngwahonene kumufumisa mumeya, kaha ikiye awolwelele kaha uze ulovo na kuchina, mokomoko nakulikoko nakuya. Kaha etu twapwile na vizovolela vavavulu, pamo handulendi na fifite mukulema ya vizovolela vavanene. Kaha vakiko, vamwe vavavo valemene pamo jipaundi, na kufuma ha fwo nakutwala kuseveni, eyiti paundi. Kaha Ngwakwachile umwe wamunene, kaha ikiye ayile.

³⁹ Kaha Ngwambilijilemo cheka, kaha Ngwa—Ngwakwachile umwe mukwavo, kuheta ku sikisi, seveni paundi. Kaha Ngwapwile na mutondo wausuku uze watela kukwata haze helu lya makanda. Kaha Ndumbu walunga Evans apwile. . . . Etu vosena twapwile vakuzova hakuhala muze mumeya, mwomwo apwile kaha na lukava. Kaha ikiye tele nakoko lyehi jisapato kaha na vungununa mahinji amulukwe wenyi, kaha apwile natwame hachihela chaumu chachindende, kupwa nge nakumisa uvwalo wenyi. Kaha ikiye amwene ishi yenyi wamunene apwile nakulyalanga muze muviputa, kaha Ngwapwile nakuhala nakwiza kuli ikiye. Ikiye ngwenyi, “Chindende kaha, Ndumbu walunga Branham, Nanguya nakukwajilayo.” Kaha ikiye alahile nakuya kuze. Kaha Ngwapwile tele ngwamukoko lyehi, kushinganyeka nge uze ishi apwile hakamwihi nakumujiha, kusavala muze mulitemba. Kaha ikiye alahile nakumuzundula. Kaha, omwo ikiye alingile ngachize, ikiye echele kuze kuchipepe, kaha ikiye akindulukile hanyima. Kaha uze mbanda jila namusumu.

⁴⁰ Kaha etu twatalile hali ikiye, kaha hapwile wina wa lizo limwe mulihinji lyenyi muze uze mbanda jila atotele, kaha kungwima chatohwele chikuma palanga nomu masoji apwile nakulihichila mumeso eyi. Ngwenyi, evwile nge navifuwa vyenyi vili nakukwata kalepa. Kaha kuze etu twapwile, kwakusuku ji mailosi kunyima yachize chijiva. Ikiye apwile muthu wamunene mukumuveleka. Kaha nge linoka nakusumu, ove mupwa na misongo chikuma muminyutu yayindende

palanga nomu mwivwa nge mufwa. Kaha Leo apwile nemama. Kaha chumachimwe chejile muvishinganyeka vyami, “Ove wapwa lika Kalunga!” Kaha omwo ikiye akwachile lihinji lyenyi nakulishindakana, kaha muze mumena amazo muze uze mbanda jila asumine, Ngwahakilemo mavoko ami kaha ngwami, “Mwata, echi vachisoneka mu Lizu Lyove, ‘Vakiko navakaya nakulyata hamitwe yamanoka na tuvwanda, kaha kakwechi chuma chimwe nachikavakolesako.’” Kaha hazevene, kukola chosena chasele lize lihinji lyenyi. Kuvwala sapato yenyi na kufuta ishi likumbi lya muundu.

⁴¹ Ayile ufuku uze wosena na kuchambulula kuli vakiko, vakiko ngwavo, “Ove chamwaza unyenga kuli ndotolo.”

⁴² kiye ngwenyi, “Kachi Kalunga nangukingi noholili, Ikiye mwaya nakungulama noku kunasale.” Etu fuchile mumakumbi atatu, na misongo yauchi.

⁴³ Kalunga apwa lika ikiye Kalunga. Ikiye eji kulamanga lika lushiko lwosena. Kaha kumulimo wami wosena, luze lukiko lwola lwatete Ngwamona lyehi Kalunga kwiza kukusuma chalinoka, mwomwo echi chapwile chuma chatete Ngwapwilenga na lusesa lwa kulombelela mthuumwe vasumine kuli linoka. Ngwatondanga enu mutachikize kaha nge Ikiye eji kulamanga jishiko Jenyi josena, kaha Mazu Eyi apwa amwaza kaha amuchano. Amena.

⁴⁴ Anukenu kutangisa chaufuku na echi chili na kwiza lya Chitatu. Kaha lombelalako muthu umwe jino uze vene natokeka kumulombelela, uze ali yami. Kaha, anuka, yenu kukuliwana cha Ndumbu walunga Roberts omwo mweza ku mbaka, kaha mumenekenu nakumeneka chakufuma kumbalaka.

⁴⁵ Shimbu kanda etu tutange Visoneka, Ngwa—Ngwakutonda etu kwimana hamahinji etu mumunyutu kaha. Kaha, chakuzeneka kwimba, echa twimbenga mwaso wawih mokomoko ivali eyi yaupahu yamwaka ya liuka, “Lufwelelo Lwami Lunatale Kaha Kuli Ove.” Chosena chakwoloka, muthu wosena linungenu hamwe yami jino, kaha echa twimbenga echi. Kaha kushinganyeka omwo muya na kwimba, yimba kaha kuupahu wa Kalunga. Ove unahase kututwaminyina, Ndumbu walunga Neville?

Lufwelelo lwami lunatale kaha kuli Ove,
Ove Mukoko wa Kukavali,
Mulwilo wa ukalunga;
Jino ngwivwulile yami shimbu na Ngulomba,
Mbata kupaya chami chosena,
Mamalelo echa yami kufuma likumbi lyalelo
Kupwa kaha Wove!

Shimbu chiyoyelo chili mumilima omu
 Ngunemena,
 Kaha kunyengetela chinangujinguluka yami,
 Pwako Ove twamina Yami;
 Kasa milima kupwa musana,
 Hunda ushona, fumisa woma,
 Nge chiku yami na nguhungumuka
 Kufuma kusali Yove.

⁴⁶ Na mitwe yetu yakunongama, Ngwatondo kutanga kufuma mukusoneka chajila chamu Mbimbiliya, Mukakujila Mateu, kapetulu 7, vase 13 na 14. Kaha echa Mwata ahake kukisula Chenyi shimbu omu etu Tuli nakutanga.

Ingililenu ku chikolo cha chindende: mwomwo chikolo chachinene, najila yinahweke, eyi yakuya kukunonga, kaha vase veji kwingilamo vanapu vavavulu:

Mwomwo chikolo chachindende na jila, nawa ya kupalakanya, eyi yakuya kukuyoya, kahava navayiwana va napu vavandende kaha.

⁴⁷ Echa tulombenu. Ove Kalunga, Ove wanehele cheka Mwata Yesu kufuma kukufwa na kufuma muchimbumbwe, kaha unamunehe Ikiye kuli etu chino chimene nge Mulambu wakuyoya, etu mukulikehesa twakujika kuyoya chetu kuli Ove chachihya, ha vishinganyeka ngwetu Ove muya nakuhaka mangana etu. Shimbu etu twapwile vakashili, vakufwa mushili na kuzombojoka jishimbi, Ove watumine Mwana Nove umwe kaha lya munwe, kumulingisa kupwa wakufwana mujimba wa shili, kupwa wakumbata jishili jetu, uze wakuzeneka mulonga, kuyanjala vase vapwile namilonga, mangana atukindulwise etu cheka hamwe mu kulikata na Yove.

⁴⁸ Kaha, Ove Kalunga, kachi mukachi ketu muli shili chimene chino, chuma chimwe chinahase kutuhonesa Shipilitu Wajila kufuma kukuneha Mujimbu wa Kalunga kumichima yetu, etu twalombo nge, mukulikehesa, Mwata, Ove tukonekele etu hakuzombojoka chetu jishimbi. Tukose etu na Manyinga a Mwata Yesu. Eyi. . . Etu tunatachikiza, muli etu vavene, etu katweshi chumako, kaha etu tuli nakulikonekela nge etu katweshi chumako. Oloze Ove wajila, Ove wapwa wamuchano, Ove wapwa wakwoloka, Ove yove Kaselwoke wa keke. Kaha etu tunalikehesa mukukalava lelo, nge myono yakuvandamina. Nge omu unjiho unayi puho, kufuma ku Jamaica na kufuma ku Puerto Rico, kaha okwo Ove unazachila milimo yayinene, Ove Kalunga, echi chinapu chinjikizo cha kwiza Umwe Kaha.

⁴⁹ Omwo Ove wasokwele Ndumbu walunga Evans kufuma mumazo aulembe alinoka, mwomwo ikiye apwile mukakufwelela, kaha Mazu Ove apwa amuchano lwola lwosena. Jino, Mwata, tusokole etu kufuma mumazo akufwa chimene chino, kuze kuli mukakole natusumu naulembe. Echa kuka

Chove cha mbamu, chimene chino, Mwata, ikuchisa mashipilitu etu na kutukosa etu kufuma ku kuzeneka kwoloka. Hindula vakakuviza mumijimba yanyama vaze vanahokola na jingolo ja mukakole. Vyosena vili Kumeso a Ukalunga, echa vipwenga vya kukiwa.

⁵⁰ Hanjika kuli etu kuhichila mu Lizu Lyove wasoneka, Mwata. Kuhona kutachikiza na vyakuhanjika, oloze Ove mutuhanavyo. Kaha Ove tuhuhumune, Mwata, kaha tulingise etu kupwa vakulizanga ku Kwiza Chove. Mwomwo etu twalombo echi mu Lijina lya Yesu na mwomwo hali Ikiye. Amena.

⁵¹ Yami lwola lwosena ngweji kukotokela, mwomwo Ngunavandamina jino. Kaha Shikola yaha Chalumingo, Ngwashingtonyeka, yafumuko. Oloze kuli chuma chimwe hali echi, omwo Ngwejile kwimbo Ngwevwile nge Ngwapwile na lwola lwaluvulu. Enu munatachikiza, etu tuli mukuzangula chikuma, kalamwosena. Shikaho, etu natuya kaha nakufwelela Kalunga.

⁵² Mwata Wetu apwile nakuhana echi kuhuhumuna chakujikiza kuli vathu vachisemunuino Chenyi, vaze vathu vapwile vakakulifukula chikuma. Kaha Ikiye ngwenyi, “Chikolo cha chindende, na jila ya kupalakanya, ize ili nakutwala ku Kuyoya, kaha vavandende kaha vaze navaya Nakuyiwana.” Jino, echi kachapwile mwomwo vakiko kavapwile vakakulifukula ko. Vakiko vapwile vakakulifukula. Kaha mwomwo vakiko vapwile kakufwelela chikuma muliuka na kunangula chimwe cha vikungulwilo, kaha vakiko vafwelelele (kuheta naku) muli Kalunga, vakiko vashinganyekele nge vyuma vyosena vili vya kwoloka. Oloze Ikiye apwile nakuvalweza vakiko nge nakukapwa vavandende navakengilamo.

⁵³ Kaha Nguli nakulikomokela chimene chino kachi Nguhase kufwanyisa chize chisemunuino ku chisemunuino chino. Talenu, echi chapwile kukuma cha chisemunuino cha va Yuleya, kaha Ikiye apwile nakuvenyikila kunyima kuli vyakuhandunuka na kuhandunuka cha makumishilo a visemunuino, kaha apwile nakuvalweka vakiko nge chuma chivene chize chalingikile kuvize visemunuino vikwavo shimbu kanda vakiko chili nakulingika kumeso avo. Kaha vakiko vahonene kuchimona. Kaha echa tumone vyuma vimwe vize Ikiye apwilenga nakuhanjikaho.

⁵⁴ Vakiko, chakutalilaho, kavahashile kufwelelako nge ngwavo Kalunga apwilenga muli Muthu. Chize chikiko chimbuji chachinene chize vakiko vapwilenga nacho chakunyina, omwo Ikiye apwilenga Muthu oloze alilingise Ivene kupwa Kalunga. Vakiko vahonene kumona omwo Kalunga nahase kutwama mumujimba wanyama. Kaha muvisemunuino vyosena, mulwola lwosena, Kalunga napunga lwolalwosena kutwama muli muthu. Muthu apwa katumwa ka Kalunga. Mu chisemunuino

chosena, Kalunga eji kuhanjikanga kuli vathu jenyi kuhichila mumivumbo ya vathu. Ikiye lwola lwosena eji kusakulanga mthuumwe mokomoko chumachimwe chize Ikiye nahase kuzachisa.

⁵⁵ Kaha Ikiye avenyikilile kuli vakiko, kupwa nge chimbuji, hali Apalahama. Ikiye ngwenyi, avalwekele vakiko, “Kachi enu namulisanyika kupwa ‘vana va Apalahama,’ Apalahama owo ‘senu,’ ikiye amwene likumbi Lyami na kuwahilila hakulimona. Apalahama, uze kapolofweto.” Kaha kukakasana chiku nge Yesu apwilenga nakuhanjika kuli vakiko nge Ikiye nenjikiza kuli vakiko nge Ikiye apwile Meshiya, mwomwo chinjikizo cha Meshiya chapwile nakumukavangiza Ikiye. Kaha echi chinapunga mujila kana kuhita mukala chisemunuino, chize, nge chinjikizo cha Meshiya. Oloze Ikiye kulilingisa kupwa Kalunga Ivene, uze Meshiya Ivene, uze avalingishile kutalyangila. Vakiko vahonene kwivwushisa chize.

⁵⁶ Jino, omwo Apalahama (uze vakiko vavulukile kupwa sevo) aliwanyine na Kalunga, Ikiye apwile nawa mumusonyi, mwomwo Ikiye alile nyama ya mwana ngombe, alile linona lya tiliku (kaha anuine mavele) na maji, kumeso a Apalahama, kaha ohonyi Ikiye apwile Kalunga. Apalahama amutachikijile Ikiye, kupwa Kalunga, kaha amuvulukile Ikiye kupwa uze “Ukwechi livele,” kupwa Yehova Wakulitulaho. Muthu Walunga navwale uvwalo, na lukungu ha Mujimba Wenyi, kaha natwame mwishi ya mutondo, mumuvule, na kulya nyama na kunwa mavele. Kahajino chize kukuta, muchima waukenya, lifwa, kwolaka cha va Yuleya vahonene kufwelela Ikiye kupwa Mwana Kalunga, kaha vavulukile Apalahama kupwa sevo. Kaha Ikiye apwile nakuvechela vakiko vatachikize nge Ikiye apwile nakulinga chuma chochimwe, mu mujimba Wenyi, nge Kalunga achilingile mumujimba wanyama omwo Ikiye aliwanyine sevo, Apalahama. Kaha Apalahama achifwelelele chize. Kaha vakiko kavahashile kufwelela chizeko.

⁵⁷ Enu mwamono, omwo Apalahama apwile natwame mwishi ya mumbalaka yenyi mwomwo ikiye nasakula lyehi, kaha chize kusakula vanachinehe kuli muthu wosena uze nasemuka muno mukaye. Uze mutondo wamwaza na kupihya vanauhake kumeso akala muthu. Kaha omwo Lote, muhya wenyi, kaha tufunga vapatukile kulipika ha mavu; Apalahama, kupwa muthu wakwoloka, ahanjikile kuli vakiko, “Echenu kanda kupwa kulipikako mukachi ketu. Enu sakulenu kaha jila yenu namuya.” Chize chihela chochimwe cheji kwizanga muchiyoyelo chamukakufwelelele wosena. Kaha echi chili kumeso ove chino chimene, kaha echi chili kumeso ami.

⁵⁸ Lote kashinganyekele nge ikiye apwile nakuya nakusali yakunyima, oloze ikiye ayile nakutala kutwala ku Satome kuze kwapwile vyuma vyawashi. Kaha lwola lwaluvulu luze etu tweji kutalanga kutwala kujila yawashi. “Nanguya nakulinunga

na eli liuka lya munganji mukanaga, mwamono, naumwe pimbi mwaya nakuhanjika hali echiko, mwomwo lili liuka lyalinene mumbongi.” Ize jila yawashi! Lwola lwaluvulu etu tweji kulinganga ngocho, nge etu twahenge!

⁵⁹ Anuka, kachi ove mukavangiza Kulishitu, ove navakujinda kuli vathu, mwomwo vosena vase veji kuyoyanga mwaukalunga muli Kulishitu Yesu navakaya nakuvayajiwisa. Kaha kachi ove mwiza kuli Kulishitu, ove kwatela kwiza kuhichila mukala liukako mokomoko mukala chikungulwilo, mokomoko mukala kunangula cahuthu. Ove mwiza ha Manyinga, akiko kaha chihela. Kaha ove kaweshi kuneha naumweko, muya nakwiza ukawove na kwimana hakulikonekela cha lufwelelo lwove. Ove kaweshi kuhasa kuchihaka hali kafungako, mokomoko halufwelelo lwa nokoko. Ove muya nakwiza nge ukawove hakapanji omwo mwiza kuli Kalunga! Kaha lwola lwaluvulu etu tweji kusakulanga kusakula chauleya.

⁶⁰ Kwiji pamo nge Lote, omwo amwene vyuma vyosena vinashiwa...? Ikiye amwene kuze kwapwile mali amavulu na puho yayinene, mwomwo ikiye hakupwa ngeji, kaha lunga wautongwe, wakitanga, na kutanga chakutumbununa muthu, kaha ikiye nahase kulinga vyuma vimwe na kulama kulifukula chenyi. Ikiye ashinganyekele, “Ngukwechi lufwelelo muli Kalunga, shikaho Nanguya kaha nakushikumuka ku Satome kaha Nangu—Nanguya na kupwa namali amavulu, kaha Nanguya nakupwa lunga wamunene, pamo mukakunangula wamwaza.” Talenu, ove uli na kusakula.

⁶¹ Kaha navaze vakuhona kulinangula vatela kusakula. “Nanguya nakushikumuka kuliuka lya kunganji. Mamalelo, muthu mumbaka kushinganyeka nge echi chiko chamwaza! Mwomwoika, uze nguvulu yambongi atwama muze muliuka.” Jino, ikiye nahase kutwama muze muliuka chili chamwaza vene, oloze chochimwe ove watela kutala kanawa liuka na vathu jacho na Visoneka. Lwolalumwe vakiko vejikuyanga mwomwo lili napuho, vase—vase vathu veji kuvwala kanawa nakuya kuvihele vimwe. Kaha haze hakiko etu tweji kulinganga ku—ku kuluwisa chachinene. Jino talisenu kanawa hali echi.

⁶² Kaha Apalahama, chuma chimwe kaha ikiye ahashile kulinga shina kusakula chamuchivali. Kaha lwola lumwe kusakula chamuchivali chapwa chamwaza kuhambakana chatete, kachi nauchimbata ngachize. Talisenu, kaha shimbwileko, omwo Lote amwene mbongi yayinene, ikiye kamwene puwenyi kwalumuka panda ya mungwa, chipwethuhu, ikiye kamwene kuwema cha mbongi. Oloze Apalahama ayile na vase vavandende vakutoleka va Mwata. Ikiye atwamine muze muusekeseke.

⁶³ Kaha, ohonyi, kwiji nge Sala ahanjikile ngwenyi...Jino anuka, Sala apwile pwevo wamwaza mulifuchi lyosena. Kuze

kakwapwile pwevo wamwaza nge Salako. Wosena amumwene, amuzangile kachi apwenga puwenyi. Jino, omwo kachi chashiwile kuli Sala kupwa nelu lusesa kana. Oloze ikiye asakile kutwama na Apalahama.

⁶⁴ Mamalelo, pwevo, kanda kwecha liyavolo akufwike meso ko, kupwa wapuhu na kulinunga na *nechi* na *chize*. Ove twama na Kulishitu! Mwomwo, lwola lunahete, kulyenyeka chilihalutwe, kuhambakana Satome na Ngomola, kuhambakana lino lifuchi. Satome na Ngomola nalikapwa lya mwaza.

⁶⁵ Jino, shimbu Apalahama ambachile jila ize vamuhanyine kuli Kalunga, kaha apwile nakukundamina hamavu, ikiye kapwile wakufukilako. Oloze ikiye atachikijile chumachimwe, ikiye azachililenga Kalunga kaha ikiye amufwelele Kalunga.

⁶⁶ Shikaho likumbi limwe kwejile malunga vatatu, kaha vakiko vapwile nalukungu kaha vanazeye, kaha Apalahama avevulile keke, ikiye ngwenyi, “Twanyenu na kutwama mwishi ya mutondo tando yayindende.” Kaha shimbu ikiye apwile nemana nakuhanjika navo, ikiye amwene nge kavapwile malunga kahako, ha kuhanjika chavo. Vakiko vapwile vakuhandunuka. Kaha Apalahama ayile na kujiha mwana ngombo na kumuteula, kaha amulwekele Sala atunge jimbolo nakujiwahisa mangana kuvalisa vakiko.

⁶⁷ Jino anuka, vavali vaze Vangelo, Vangelo mumujimba wanyama, kaha umwe wavo apwile Kalunga Lyavene. Kaha Umwe uze apwile Kalunga apwile natalisa Nyima yenyi kumbalaka.

⁶⁸ Kaha Sala atwamine muze mumbalaka. Ngwatondo kumona pwevo kulama chihela chenyi ngachize, keshi kulovoka na kuya nakumulweka lunga lyenyi vyakulinga, kaha lwola lwosena umwe mweza. Oloze ikiye atwamine mumbalaka. Kukakasana chauchi, pamo kukosa malonga mokomoko kulinga chumachimwe.

⁶⁹ Kaha ou Umwe Uze apwile Kalunga, Ikiye atwalileho kutala ku Satome, kaha Ikiye avalwekele omwo Ikiye mwaya nakulinga. Kaha Vangelo vavali vanyile muze na kunangula Mujimbu wamwaza. Oloze Umwe asalile, uze apwile Umwe apwile Kalunga, kaha Ikiye ngwenyi, “Nguyenga na kumuswekela Apalahama ocho Ngunatachikiza, mwomwo ikiye mwaya nakupwa kwasana wakano kaye.”

⁷⁰ Mamalelo, etu tukwechi echi chimene chino, liuka, kutachikiza chiswamo cha kwiza cha Mwata. Mwomwo, “Vakukisula vakuneha kuunda, vakiko navakava vuluka kupwa vana va Kalunga. Vakukisula ava veji kwivwanga zala na pwila, vakiko navakavekuchisa. Vakukisula ava vatoma mumuchima, mwomwo vakiko navakamona Kalunga. Vakukisula ava vavavovu, mwomwo vakiko navakaya na kuswana hamavu.”

Kahajino, kachi liuka lya Kalunga wakuyoya naliswana hamavu, kaha kakwechi kuvaswekela chuma chimwe kuli vakiko.

⁷¹ “Vyosena Tata angulwekele Yami, Ngunamilwekevyo,” ngwenyi Yesu. Kaha vakiko kavahashile kumufwelela Ikiyeko.

⁷² Shikaho mumakumbi a Apalahama, nge omu Ikiye apwile nakuvavuluka vakiko, Ikiye ngwenyi Apalahama apwile nakuhanjika kuli Vangelo, kaha Ikiye nyima yatalishile kumbalaka, kaha Ikiye amulwekele Apalahama nge Ikiye mwaya nakumumenekela na mwana. Kaha Sala, muze mumbalaka, asehele. Kaha Ikiye ngwenyi, “Ika Sala asehela?” Ika Ikiye apwile nakusolola? “Ika Sala nasehela?” Chize chapwile mujiola jajindende shimbu kanda kwenyeka, omwo chize chasolokele. Shimbu kanda kwenyeka, kaze kakahya kejile nakufuma mwilu na kwocha ize mbongi, kaha chize chinjikizo chazachiwile.

⁷³ Kaha Yesu ngwenyi, “Enu mweji kuseuka,” nakuya kuli va ndotolo vavanene vakutahisa, kuli lifuchi lya kulifukula kuze kuli kaha jimiliyoni ja vakakufwelela. Ikiye ngwenyi, “Enu mweji kuseuka, kuhona kutachikiza Visoneka chipwe Ngolo ja Kalunga.” Kuli chisemunuino nge ngachize, vaze vapwile namalunga vakulongesa kanawa, vaze vapwile vakulinangula kaha vakukulishila muliuka. Chapwilenga nge mwana nasemuka, apwilenga luheto lwa liuka. Ove watela kupwa ka Isalele. Makumbi eyite kufuma hakusemuka, chapwilenga kwalamisa, kaha enu mwapwilenga va Isalele kukuputuka. Kaha uze kapilishitu wakufuma kuli vaka Levi, vaze vapwile vakulongesa kuhichila mummyaka handulendi mu Visoneka. Chipwengocho Yesu ngwenyi, “Enu mweji kuseuka, hakuhona kutachikiza Visoneka!” Vakiko vatachikijile kufuma muze mumukanda wavo wakulinangula, vakiko vatachikijile kuhichila mukatekisiti, vakiko vatachikijile ha kutanga chavo chuthu. Oloze Yesu ngwenyi, “Enu kamwatachikizako Echi, echi Chisoneka, chipwethuhu kutachikiza Ngolo ja Kalunga. Kachi enu mwamutachikijile Apalahama kachi munangutachiza Yami. Kachi enu mwapwile vana va Apalahama, enu kachi mwangutachikiza Yami, mwomwo Apalahama awahilile omwo ikiye amwene likumbi Lyami, mwomwo amwene lyehi eli likumbi. Omwo Ngwemanyine kumeso eyi kunyima kuze, mumujimba wanyama, kaha azachile echi, ikiye atachikijie nge Yamivene, kaha ikiye anguvulukile Yami kupwa ‘Elohim.’ Oloze kuno Ngweji kulinganga chuma chochimwe kumeso enu, kaha enu namunguvuluka Yami kupwa ‘Mukulwane wavandemoni.’”

“Mamalelo,” vakiko vahanjikilenga ngwavo, “etu tukwechi Apalahama kupwa setu.”

“Kuvuluka Apalahama kupwa ‘senu’?”

⁷⁴ Ikiye ngwenyi, “Ika, etu, twapwa vakamauka. Etu twapwa lifuchi lya vakakulifukula. Etu twapwa vathu vavanene. Etu twapwa vathu ja Kalunga!”

Yesu ngwenyi, “Enu muvaliyavolo, ikiye senu.”

⁷⁵ Chinahase Ngufwanyise chino chisemunuino na echi chimwe, lelo, omwo kuli jimilinyone ja vathu vaze veji kulivulukanga kupwa Vakakulishitu, kaha vakiko kavatachikiza Kalunga ko kuhambakana ka Hottentet mwahasa kutachikiza ufuku wa mu Ejipitu. Kuli malunga na mapwevo lelo, jimilinyone vaze vali nakulivuluka kupwa Vakakulishitu vaze vali nakusanyika Kulishitu, kavatachikizako lushimbi lwatete lwa Ngolo Jenyi jakusanguka, kaha kanda vamakile kuwaha Chenyi. Vakiko kanda lyehi vevwanga Ngolo Jenyi. Meso avo anapu akuwava kufuma ku Muchano.

⁷⁶ Ngwenyi, “Enu munapu tupuputa, vatwamina ja tupuputa. Kachi...uze...kachi kapuputa mwatwaminyina kapuputa, kavechi kuholokela muwinako?”

⁷⁷ Kahajino vakiko vashinganyekele, “Etu twapwa Vakakulishitu. Etu twapwa vakakufwelela. Etu twapandama kuliuka lya helu mukachi kawakwavo. Milongeshi jetu vapwa vaze vamwaza vakulongesa kanawa.” Kaha Yesu avalwekele vakiko nge vahonene numba kutachikiza Visoneka.

⁷⁸ Talenu omwo Kalunga eji kuswekanga vyuma evi kufuma kumeso avakamangana na vakakunangakana, oloze kuvisolola kuli vakemba vaze navaya nakulinangula? Mamlelo, Ngolo jajinene na kuhona kuputuka cha Kalunga! Omwo Ikiye apwa wamwaza kuli vaze vali nakufwila kutambuka mwakwoloka kumeso Eyi! Ikiye mwaza na kukwachilila navyuma vyamwaza.

⁷⁹ Kaha kumona likumbi omwo lifuchi lyetu, kaye ketu, kali kakulyenyeka na vyuma vyovimwe!

⁸⁰ Yesu atondele hazevene kuvolola. Vakiko ngwavo, “Mamalelo, Apalahama ikiye tata. Kaha etu natuya nakupwa Muupahu, kanda Ove kulizakaminako, mwomwo etu twafwelelela muli Kalunga. Etu twapwa vakukutanga chikuma, kaha etu twafwelelela muli Kalunga, kaha etu tweji kunangulanga vathu. Kaha Ove yove hiya mwiza kuno na—chinjikizo cha kukomwesa chachindende na kweseka na kusanyika Kalunga? Ove kawechi chumako shina Mukulwane wava ndemoni.” Ove uze haze, vakiko vapwile na kunangula chauthu na vikungulwilo vyavo.

Yesu avalwekele vakiko, “Enu munapu valiyavolo.” Shinganyeka hali ocho!

⁸¹ Kaha Nangufwanyisa chino chisemunuino kuli echi, lelo omwo etu tukwechi kulinunga chamauka mujimilinyone, etu tukwechi masauzande likumbi. Kaha Kalunga kwiza nakuyoyela muliuka Lyenyi cheka, kaha nakulinga chuma

chochimwe chize Ikiye alingile kuze, kulilingisa Lyavene kupwa zau, lelo, na hayamyaka. Kaha vathu vatalishile nyima kufuma kuli chize, ngochovene, vamwe kupwa vapuho, vamwe kuvahonesa kupwa nakusakula. Echi chashinjilile vathu! Enu mwatela kusakula. Enu kamweshi kuhasa kwimana hakachiko. Enu mwatela kuhanjika “eyo” mokomoko “nduma.” Enu kamweshi kuya nakuseza chize chikolo muuthu woumwe wengilelemo nakulovokamo. Enu kamweshi kuhasa kulinga echiko. Enu mwatela kusakula. Chilinge holili jino hali Kulishitu chimene chino.

⁸² Vakiko vashinganyekele nge kupwa muliuka kaha navakulwila. Yesu ngwenyi, “Chikolo chachindende, kaha jila yakupalakanya, kaha oloze vavandende navaya nakuchiwana.”

⁸³ Echa yami ngumihuhumune chimene chino, liuka, pwenu vakuzangama. Echi nachimbata lwola, mu kwoloka cha kulihana etu vavene, chisemunuino chakulimona nge vaswisa vyosena cha kulyonga echi etu tuli nakuyoyelamo. Mu ola kana omwo malunga na mapwevo vanemana mumauka na mujisenge, na kwimba myaso ya Kalunga, kaha kulovoka muze muliuka kaha kuya nakunwa makanya, na kunwa wala, kaha nakuya nakukinakina, kaha—kaha kuyoyela kaye, na kwambulula majilo, kutatwoka usese, kaha kulivuluka vavavene kupwa “Vakakulishitu.” Omwo malunga na mapwevo vanahase kutambuka nakufuma kukamenga mokomoko kufuma muliuka, kaha kufuma muchihela cha Ngolo ja kusanguka, kuze uze kwapwile chinjikizo cha Meshiya chapwile nakusoloka mukachi kavo, kaha keshi kupwa tengeso yayihya muli Kulishitu, kuli chuma chimwe chakuhenga. Omwo mapapilo anahase kutotoka; nakufuma ku kungenge na kutwala kungenge, noku noku, kufuma kungalila yachishika chikuma kukuto mumuzenge nakutwala kumusamuko, Kalunga ikiye eji kuvitumanga, kaha vathu lwolalwosena veji kutalisanga nyima kulichize. Kahajino etu natwamba ngwetu ika, ika etu natulinga? Etu twalumukenu ku Visoneka kuze Ikiye nahanjika, “Chikolo cha chindende, kaha jila yakupalakanya, kaha oloze vavandende navaya nakuyiwana.”

⁸⁴ Ikiye ngwenyi, “Nge omu chapwile mumakumbi a Nowa, shikaho mukiko nachikapwa Kwiza cha Mwana muthu nawa.” Iwvililenu, mumakumbi a Nowa, kaye kapwile navathu vavavulu nge omu kali lelo. Sayasi yavo yapwile yayinene kuhambakana yetu. Vakiko vatungile tuposhi na vivili na kulinga vyuma vize etu katweshi kuhasa kulingako lelo ko. [Hatepu hapimbi—Muka.] Chuma, chachinene, vathu vautongwe. Kaha anuka, sayasi yahanjika ngwayo, “Kuli munyutu umwe shimbu kanda mukachi kaufuku.” Chili munyutu umwe shimbu kanda koloko yihete ha ola yakufwa. Echi nachipwa chakulivanga kuhambakana omwo tunashinganyeka. Ngwafwelelela nge echi—kufwelelela nge

Shipilitu Wajila mwaya na kujimika echi mukachi kamuchima wamukakufwelela, “nge omwo chapwile mumakumbi a Nowa”!

⁸⁵ Vangahi valwilile mumakumbi a Nowa, kulovoka muli chize chisemunuino? Eyite, eyite kufuma mulivavavulu vajimiliyoni. Ikiye ngwenyi, “Shikaho mukiko nachikapwa na ha Kwiza cha Mwana muthu nawa.”

⁸⁶ “Kaha nge muze chapwile mumakumbi a Satome, shikaho mukiko nachikapwa naha Kwiza cha Mwana muthu nawa.” Kuhambakana masausande teni, kuze kwapwile vatatu kaha valwilile.

⁸⁷ Enu hanjikenу kuli yami jino, “Mukakunangula, nyiawa masauzande osena aze nawakeza na Ikiye?” Jino, ndumbu walunga, vaze vanapu vakufuma na muvisemunuino vyavivulu.

⁸⁸ Nanguya nakulikomokela kachi mazavu na mazavu nawaya nakulovoka muchino chisemunuino. “Chikolo cha chindende, kaha jila ya kupalakanya, kaha oloze vavandende navaya nakuyiwana.”

⁸⁹ Mamalelo, Ngunatachikiza mauka, ovyo vakiko navahanjika, “Kachi ove muhaka lijina lyove mumukanda kaha ove mwiza nakupwa membala, *echi*, ove unoloka.” Kakweshi changocho mu Chisonekako. Kachi vyuma vyosena vikwechi lijina mumukanda, kaha mu—mu liuka, namuya nakupwa jimbiliyoni na jimbiliyoni na jimbiliyoni yalwola, vyuma vyosena naviya nakwingila. Kahajino mashipilitu osena kala nawaya kupwamo muze, kaha chiyoyelo cha Mwilu nachikapwa ngachilihi? Shinganyeka hali echi jino.

⁹⁰ Nge mutuumwe mwahanjika kuli yami ngwenyi, “Jino vandamina munyutu kaha, Ndumbu walunga Branham. *Munganji na mukanaga*, Ngwevwanga vakiko kuhanjika mumalimi, Nguanatachikiza vakiko navaya nakukwingila.”

⁹¹ Echi kachalumbunukile nge vakiko navaya nakwingilako. Paulu ngwenyi, mu Kolinde wa Kulivanga 13, “Chipwe Nanguhanjika mumulimi lya vathu na vangelo, ohonyi kangweshi nazangiko, Yami ngu wamokomoko.”

⁹² “Mamalelo, Ngwayile kukuliwana *Munganji na mukananga*. Mamalelo, ikiye alingile vyavinene, milimo yaundume. Ngwamwene ikiye kulingisa kapuputa kumona.”

⁹³ Chochimwe ikiye hanga ali wakujimbala. “Vavavulu navakaya nakwiza kuli Yami mulikumbi lize na kuhanjika, ‘Mwata, kumana Kangwanangwile mu Lijina lyoveko, na kupolofweta? Kumana, mu Lijina Lyove, Kangwatapwile mashipilitu amapiko? Kumana, mu Lijina Lyove, Kangwalingile milimo yayinene vyavivuluko?’ Ikiye mwakaya na kwamba ngwenyi, ‘Fuma kuli Yami, ove mukakuzata mwaupapwoki, Kangwakwijivileko.’” “Chikolo chachindende, kaha jila yakupalakanya, kaha oloze vavandende navaya nakuyiwana.”

⁹⁴ Echa yami ngumihane vyakupanamisako echi nachiminyikisa enu. Kutesekesa na sayasi ya misongo, mumbongi ya Chicago, kutesekesa na kulava cha ndotolo, nge nakukapwa vakakufumisa majimo seti sauzande mu Chicago kaha ukawavo, mumakumbi seti, evi vikiko alinavyo ndotolo. Vangahi vavavulu vali hamavundu amandende na vyuma veji kunwanga, hakufumisa majimo?

⁹⁵ Kulava chinenjikiza, mu United States, nge muli vana vakuzeneka masevo vanasemuka vavavulu kahambakana vakusemuka mukwoloka. Enu kamwatachikiza nge echi Mbimbiliya yahanjika ngocho, mu Lushimbi lwamuchivali 14:2, nge “mwana wamuujila, kuvangila mwahichi myaka handulendi numba chimuhite”? Vana vavo navana vavo navana vavo navava vavo kaveshi kuhasa kwimana muchikungulwilo cha Mwata ko, fwo handulendi yamwaka, visemunuino teni. Fwote ya myaka muze muchisemunuino. Uze kakuluka kakuluka kakuluka kakuluka kakuluka kakuluka ya kaka ya ise apwile mwana waujila, ikiye katwama mumeso eyiko! Jino ika? Ngulwekenu yami okwo echi vanachalumuna.

⁹⁶ Etu tweji kwizanga kulihi? Kaha jino vana vamuujila, mwomwo ya ujila, kaha pwevo washili kuvwala mujila nge lungu, echi chinapu chaunyengwe kumeso a Kalunga, vakakunwa makanya, vakakunwa wala, vaze vali vuluka kupwa Vakakulishitu. Kalunga nakane mazavu amahule vangachize! Chize chakwoloka. Kahajino kulivuluka vavavene kupwa Vakaulishitu? Shikangaho Yesu ahanjikile, “Chikolo chachindende, na jila yakulipalakanya, vavandende navaya nakuyiwana.”

⁹⁷ Vakiko kaveshi kuhasa kulikehesa vaveneko. Vakiko vali vakunjinjila. Tala, omwo Ndavichi vamulwekele shili jenyi jize alingile, washi washi ikiye alikonekelele, kaha Kalunga amuzangile mwomwo yachize. Ove valweke vakiko jishili javo, vakiko navaya nakuhanjika, “Kangweshi keza cheka kunoko.” Mwomwoika? Vakiko vakwechi vihela vyavivulu okwo vanahase kuya, vakiko vanahase kuya kumena avana vakuzeneka masevo vanetavila evi. Oloze lwola lunahete lwa mukakunangula kuvwala uvwalo wajita wa Kalunga na kunangula Lizu chakuzeneka kulivwasana, Mujimbu wamwaza. Malunga vatela kulikehesa vavavene.

⁹⁸ Kamweshi muchano mukachi ka Vakakulishituko chekako. Vakiko vanatondo kuhanjika ngwavo, “Yami ngumuka Mesondisiti, Yami ngumuka Mbamputishiti, Yami ngumuka Pendekosita,” echi kachalumbunukile nge [Ndumbu walunga Branham kuveta minwe yenyi—Muka.] *ngachize* kuli Kalunga.

⁹⁹ “Ngwahanjikile mumalimi, Ngwazachile vikomwesa.” Etu vosena twajikila hali ovyo vyangocho, echi chili chuma chimwe chili chaupuputa chili nakwilavisa. Punduvene. Vula yoyimwe

yeji kunokela hali vakakwoloka na vakakuzeneka kwoloka. Aze meya avula eji kutukumwinanga jimbuto na ha mwila chochimwe, Roy. Vula yoyimwe, ou Shipilitu Wajila youmwe eji kuholokela hali vathu. Echi chochimwe kachalumbunukile nge. . . Visemwa vyavo vyatela kuhandunuka, kufuma mukachi ko. Keshi kusoloka chakuwelukako mokomoko kusolola, oloze Shipilitu ya mukachi ya Kalunga wakuyoya uze eji kulingisanga muthu kupwa tengeso yayihya, ize yeji kukehesanga muchima wenyi kumeso a Kalunga.

¹⁰⁰ Ove ngwove, “Mukakunangula, ove unalumbununa na kungulweka yami nge uli nakukakasana lizavu lya mamiliyone kaha fwo miliyoni yavthu mukaye?” Ngwahono kutachiza nge mazavu nawakaya Mukuhukula. Shinganyeka hali echi! Nguli nakumilweka enu ocho Yesu ahanjikile hano mu Mujimbu wamwaza. Shinganyeka hali echi!

¹⁰¹ Ika nachilingika? Mwomwo kulyenyeka chikwechi mukachi kavathu, vana vakuzeneka masevo vana putuka kusemuka, vali nakujimiwa. Talenu, etu tunahase kwimana hano jiola na jiola, kahaka vize vyuma, kaha ove unahase kumona nge tuli nakuyoyela mukupola, mukunonga, chisemunuino cha vathu va kupola chakuhambakana. Numbathu vakiko vanahono kumona evi vinjikizo, shikangaho vakiko kaveshi kuhasa kwivwa Mujimbu wamwaza, vakiko vali vakukakama, oloze vali vakakulifukula na kulihana.

¹⁰² Kumana Yesu kahanjikile ngochoko, “Ou Shipilitu ali nakuhanjika mwakulumbunuka, mumakumbi akukuminyina vakiko navakapwa vakakulivwimba, vakakulitukujola, vakakuzanga chiseke kuhambakana Kalunga, kavazanga muchanoko, vakuhona kuunda, vakutenuka chikuma, na kusaula vaze vali kanawa, kupwa nakufwana cha kumukomokakalunga”? Talenu? Mamalelo, enu munahase kutambakana, punduvene. Enu munahase kuhanjika na malimi, punduvene. Lufwelelo naluya nakutapula liyavolo, punduvene. Oloze echi kechi chikiko etu tuli nakuhanjikahoko.

¹⁰³ Kahajino enu namuhanjika kuli yami, “Ndumbu walunga Branham, lusona lwa Vakakulishitu luka? Hiya navaya nakulwila? Enu munahase, Ndumbu walunga Branham?” Yami nguli nakufwelela muli Kalunga. Ngwahono kutachikiza. Nguli nakufwelela nge Yamivene. Nguli nakupezelesa chiyoyelo chami, hakumbihakumbi, na Lizu. Kachi keshi nakuyoya hamwe na eli Lizuko, kahajino kuli chuma chimwe chakuhenga, Ngwatela kuya kunyima nakwolola.

¹⁰⁴ “Chamwaza,” hanjika, “Ndumbu walunga Branham, omwo vathu navahanjika mumalimi, kumana chize kachalumbunukile vakiko kaveshi vakulwilako?” Nduma, Mwane! Nduma, vene! Ngunevu valozi na vakakupanda kuhanjika mumalimi, nauleya wosena. Ngunamono vathu kuhanjika na malimi ohonyi ali

nakuyoya na pwevo lyambala. Ngunamono vathu kuhanjika mumalimi, nakutumbuka helu nahamavu nakutambakana nge zuvo hakakahya, kaha kulovoka nakuya na kukulinga kusekasana chakuhenga, na kwivwa, kwambulula makuli, na vyuma vyosena. Kaha nachivandamina ngachilihi? Nduma, mwane.

¹⁰⁵ Kupandama kuliuka, mukakuzata muliuka, wakulihana nge omu vakiko vanahashila. Mwomwoika, enu mwashinganyeka vakiko vanahase kulanda maji ha Chalumingo? Nduma. Oloze ha Chimwe kulinga vyuma vimwe vya majilo kaha vyakupola vyakushikumuka. Kalunga atwama mumuchima, keshi kuwelukako, echi chuma kana chatela kufuma mukachi kamuchima.

¹⁰⁶ “Chikolo chachindende, kaha jila ya kupalakanya, kaha oloze navaya nakuyiwana vavandende.” Nge muze chapwile mumakumbi a Nowa, eyite kufuma mukachi kajimiliyoni; nge muze chapwile mumakumbi a Satome, vatatu kulovoka mujimiliyoni; shikaho mukiko nachikapwa nahakwiza cha Mwana muthu.

¹⁰⁷ Kaha mwamono echi kupola kana etu tulimo. Mwamono omwo vishinganyeka vyosena, muthu, ikiye kulovoka muze kaha liyavolo kumulingisa kupwa mukakunangula wautongwe kwimana kukamenga na kwecha vathu kupwa nachuma kana.

¹⁰⁸ Likumbi likwavo muthu umwe ngwenyi, “Kangweshi kusaka ove kupwa mukamenga kamiko, ove mulingisa mapwevo jami kuzaluka.” Nduma, vakiko vapwamo lyehi. Echi nachivaneha vakiko muvishinganyeka vya kwoloka, kuvalweka vakiko vechenga kuvwala ou uvwalo kana na vyuma kana. Kaha, chamwaza, mthuumwe atela kulinga echi.

¹⁰⁹ Ngwahanjikile kuli puwami, “Kutala Ngunazaluka, amilyavene? Ami Ngulimukuzaluka? Mokomoko, ukalu ulihali na yami?” Chumachimwe kusali eyi chinahono kwimana. Ngwatela kuchambulula Echi, Kangwazakamako ovyo kala muthu mwahanjika.

¹¹⁰ Kuhanjika, “Ove nauya na kwenyeka mulimo.” Chamwaza, kala mulimo uze Mujimbu wamwaza nauya nakulyeka, watela kulyenyeka.

Kalunga eji kuhana kumika ha kwimanyina ha Muchano na kwambulula Muchano hali echi! Echi chili shili, chasonyi!

¹¹¹ “Chikolo chachindende,” ngwenyi Yesu, “kaha jila yakupalakanya.” Kaha enu muli nakushinganyeka jimiliyoni, kaha enu vosena va Mesondisiti, Mbaputishiti, Pulishiteliyani, Pendekosita kuya nakwingila, enu navakaya nakumihulamisa hali lize likumbi. Yesu ngwenyi, “Vavavulu navaya na kutwama mu Wangana, kuhanjika, ‘Ngukwechi lusesa lwakupwa hano.’” Ikiye ngwenyi, “Oloze vana va Wangana navakaya nakuvatapula nakuvalovola. Kuze nakukapwa kulila na kutetumuka

na kulingenjunga kumazo.” Echi chili chamwaza kutala muchiyoyelo chimene chino, Vakakulishitu. Kuze kulinakuya nakupwa teni miliyoni mukuvula na teni miliyoni mukuvula vaze valivuluka kupwa Vakakulishitu, kaha vakwimana chikupu muchiyoyelo chavo, vaze vanakuya nakujimbala muchikolo. Mukiko ambile Yesu.

“Vangahi navengilamo?”

¹¹² Ngwahono kutachikiza vangahi vali nakuya. Chuma chimwe kaha, “Kalunga, echa ngupwenga umwe wavo!” Echi chakwoloka. Ikiye apwa Mukusopesa. “Echa ngupwenga umwe.”

¹¹³ Enu ngwenu, “Ndumbu walunga Branham, ove nauya ngachilihi nakutachikiza nge ou Mukakulishitu?”

¹¹⁴ Ngwahono kutachikiza. Oloze echa ngumilweke enu omwo Chisoneka chahanjika. Punduvene enu mwafwelela Echi. Omwo ou Shipilitu Wajila vamutumine kwiza hamavu, Kalunga ahanjikile kuhichila muli Shipilitu Wajila. Ikiye atumine kangelo na kuya—kuya, chakulivanga. Kaha Ikiye ngwenyi, “Yako nakuhita mumbongi na mukachi kavathu, kaha haka lusona hajiholo javo, halivakiko chize chinjikizo na kutambakana hali vakiko ha unyengwe wavo, kwolola vize vyuma.”

¹¹⁵ Nyi unyengwe chuma muka? Apwa pwevo uze navwale uvwalo wakupandama kuli muthu walunga. Echi cheji kulingisanga Kalunga kuviza. Enu mwemanaho lyehi kuze kuli vyuma vyaunyengwe? Omwo nachikulingisa ove kuviza! Ove kaweshi kuhasa kwimanako kuli chizeko. Pwevo uze mwavwala uvwalo wakupandama kuli muthu walunga, mukiko mujila yoyimwe eji kwivwanga Kalunga; enu munahase kwimba mulizavu lyavakakwimba, enu munahase kulomba hakumbi hakumbi, na kutambakana hakumbi hakumbi, mokomoko kuyoyayela Kalunga hakumbi hakumbi, enu muli vakupayiwa Kumeso a Kalunga. Echi chili vene mukiko chahanjika Chisoneka. “Kaha Unyengwe!” Kaha vaze veji kukwatanga vyuma vyangana vali na chihanda nachechi.

¹¹⁶ Kalunga atuhane likoji lya kwimanyina vyangocho. Kachi ove unahase kwimana hali ove lyavene, imana haze na kukwachilila ku Lizu lya Kalunga mulivoko lyove. Eli kalyeshi kahasa kahonako.

¹¹⁷ Jino etu tuneza kulikumbi limwe, kuze, uze unyengwe wa vathu. Kaha na Kangelo nayi nakulami ka katachikijilo cheka. Nguwanyinenu muthu umwe mu Jeffersonville, kachi enu munatondo kutachikiza hiya mwaya nakwingila, nguwanyinenu umwe muthu muno mu Mbongi yetu ali nakunyengetela na kulila, lwola lwosena kumunyengetesa na kumuzeyesa, na kulombelela ha unyengwe ou uli mumbongi. Kaha imika livoko lyove na kaha ika muthu umwe? Kahajino mbata echi

Chisoneka, “Chikolo chachindende, kaha jila ya kupalakanya, yili nakutwaminyina ku Kuyoya, vavandende kaha navaya nakuyiwana.” Mukiko kaha umwe nahase kumulamika katachikijilo.

¹¹⁸ Mamalelo, Ngunahase kuminyikila enu vavavulu vali nakuya kuliuka. Ngunahase kuminyikila enu vavavulu vali nakwimba mumazavu avakakwimba. Ngunahase kuminyikila vavavulu vali nakunangula mushikola ya Chalumingo. Ngunahase kuminyikila vavavulu vali kulutwe lwa—lwa mazavu amanene. Ngunahase kuminyikila enu vavavulu vali nakutambakana, vavavulu vali nakuhanjika mumalimi, vavavulu vali nakuzata mu Mujimbu wamwaza.

¹¹⁹ Oloze ngwinyikile umwe uze mukachi kamichima yavo eli nakulinyenga ha shili yamuno mukaye! Ngwinyikile mukakunagula uze nahase kwimana lelo na kupaisa vase vamvikungulwilo. Ngwinyikile mukakunangula uze mwaya nakwimana na kuhanjika vyuma, na kupaisa evi vikungulwilo. Ikiye nge mwachilinga, ikiye navaya nakumutapula, mwomwo kuli ikiye chinapu chitupa chakulila.

¹²⁰ Nduma shikangaho Billy Graham amulwekele Jack Moore, ngwenyi, kanda kumona kuliwana chingahi chinemana, ngwenyi, “Ikiye keshi ka Mbaputishiti ko, numbathuhu Mesondisiti mokomoko Pendekosita.” Ngwenyi, “Kaha vosena muli vakiko vanamufumbukila ikiye.” Punduvene, Kangweshi nakuhanjika ngwami... Ou ukiko mulonga Ngwambilanga Ngwami, Kangweshi kuhasa kuhanjika echi mulikungumbuwa ko. Ngwahanjika echi kuliuka lyami. Nguli na kulipika, mwomwo ya ola ya kweseka hali yami.

¹²¹ Vakiko ngwavo, “Kachi enu namuya nakwiza, echi nachiya nakupwa chakwoloka, oloze kanda enu namuhanjika hachuma chimwe hali Chize.” Enu munahase kupwa chamwaza kulama kuhwima.

¹²² Nanguya nakunangula ovyo Kalunga nahanjika ngwenyi nangula! Echi chakwoloka. Umwe wavo hali va eyiti navaya nakupwa hamwe. Umwe wavo mwaya nakupwa kumwe. Oloze halikumbi Kangwatondele kupwa wakupaishiwa hakuhanjika nge Nguli nakulivwasana mwomwo jishimbi jamauka mokomoko kunangula chaliuka, mokomoko vimwe vikungulwilo. Ngunanangula Muchano!

¹²³ Vakiko ngwavo, “Mwomwoika, mwomwoika mulimo wove, Ndumbu walunga Branham, echi chinasoloka kupwa chachinene, mwomwoika nauhonene kukomba nge omwo vapwa vathu vosena vali nakulinga?”

¹²⁴ Muze mukiko mwakwoloka kuze. Muze mukiko. Nanguya nakwingila mumbongi, enu mwashinganyeka nge Assemblies ya Kalunga mwaliwana na yami? Keshi omwo Ngwafwelelako, vakiko kavafwelelako. Twahase kumbatako umwe kaha

shimbu. Enu mwashinyenga Mesodisiti mwahasa? Kweseka, na kuwana. Pwako fumbelo yami muno mumulungu. Kachi ove muya nakwingila, muya nakwingila Mulijina Iya Yesu. Chize chakwoloka.

¹²⁵ Mamalelo, eyo vene, vakiko navamitwala enu kuze, punduvene, nakumitwala kuze kuchihela chimwe, kaha shikaho enu kamweshi kuhasa kupwa vakulinunga na vakiko mukala jila nge ngachizeko. Kaha kahajino omwo enu namuseza, kuhanjika, “Mamalelo, jino, Ndumbu walunga Branham ali nge wakuluwangana muwongo chindende, munatachikiza. Ikiye. . .”

¹²⁶ Kachi Nguli wakuluwangana muwongo, kahajino na Mbimbiliya nawa yafumu Mukunangula. Omu mukiko Mbimbiliya yahanjika! Eyo, mwane. Tala!

¹²⁷ Yesu ngwenyi, “Mwomwoika munangusanyikila Yami kupwa ‘Mukulwane wavandemoni?’ Enu mwamufwelele Solomoni, chinjikizo cha kutumbununa vishinganyeka vya vathu. Enu mwafwelela lino likumbi. Uze Mwangana wapwevo wakumusamuko kufuma kusongosongo ya lifuchi, kumona uze wana, kaha ikiye afwelelele chize omwo achimwene. Kaha enu namutwama na kutala hali chize hakumbi hakumbi, na kuhona kufwelela chize.”

¹²⁸ Kaha Vandumbwenyi vamaalunga kuhona kufwelela Ikiye. Ngwenyi, “Enu yenu kuchifupa wenga,” Ikiye ngwenyi, “oloze Kangweshi helu jino.” Ikiye ayile jila ikwavo, mwomwo Vandumbwenyi Ikiye kavamufwelele Ikiye ko. Chize chakwoloka. “Chikolo chachindende, kaha jila yakupalakanya, kaha vavandende navaya nakuyiwana.”

¹²⁹ Nge natwiza kutumbaji, nakuchisolola, kwosena okwo vakiko vali? Pwevo na lunga vemanjine kukulusu na Ikiye, Yowano na Maliya. Vavavulu vosena vayile.

¹³⁰ Echi chinapu kuchisolola. Elu hilwola. Echi chili omwo Kalunga alinakulinga vyuma vimwe. Echi chinapu omwo Meshiya ali hamavu. Echi omwo Ngolo ja Kalunga jili nakutambuka kuli vathu Jenyi. Kaha vakiko veji kuvasanyika “vakakujila vakulyalanga, kuzaluka, kuvayangila,” mamalelo, nge ngocho. Oloze ola eli hano!

¹³¹ Kuze nakuya nakupwa sonyi yayinene kuze kwakusopela.

¹³² Mamalelo, mukakusekasana chakuzeneka lisesa, ikiye natachikiza okwo ikiye mwakaya nakupwa hakusopesa. Chochimwe na mukakuteleka wala natachikiza okwo ali ikiye nakuya nakupwa. Chochimwe na lihule natachikiza okwo ikiye ali nakuya nakwimana. Chochimwe na mukakuhema juka natachikiza okwo ikiye mwaya nakwimana. Chochimwe na chitakwa chawala natachikiza okwo ikiye mwakaya nakwimana. Ikiye mwakaya nakuhona kwivwa sonyi.

133 Oloze sonyi nayiya nakupwako, vaze vashinganyekele nge vakiko vali va kwoloka. Kuze kukiko nakukapwa sonyi. “Omwo vakiko navakaya kuze, ngwenyi, ‘Punduvene, etu natukatapula vandemoni Mulijina Lyove. Etu tunapu vakakunangula. Etu twapwa vakupandama kuliuka lya munganji na mukananga. Etu twalingi vikomwesa vyavinene. Mamalelo, etu twanangwile! Mwomwoika, Ngunapunga—Ngunapunga mukakuzachila muliuka. Ngunapunga kalama. Ngunapunga *omu*.’ Fuma kuli Yami, ove mukakuzata mwaupapwoke, Kangwakutachikizako.” Oveunonyi kakomakakoma. Chize chinapu sonyi. Ikiye ngwenyi, “Vaze vana vavana vavo navaya nakwingila na kutwama Muwangana, hanjika, ‘Etu tukwechi lusesa lwakupwa hano,’ kaha vakiko navaya nakuvambila kumilima, kuze navakaya nakulila na kuteta na kulingejunga kumazo.” “Chikolo chachindende, jila yakupalakanya, ize ili nakutwala mu Kuyoya, vavandende kaha navaya nakuyiwana.”

134 Kuli ove, enu watu jami, chimene chino, ivwililenu kuli echi. Kangwalingile echi ko. Ngulinamulimo wakwambulula Echi. Mukiko mwosena Nguli namulimo hali echi. Kachi Kanda lyehi ngunangule mujimbu ukwavo mu chiyoyelo chami, ou ukiko Muchano: kuze kulinakuya nakupwa vathu vavandende navapwa vakulwila. Anukenu kaha: vavandende kaha. Enu namupwa umwe wavo.

135 “Vakiko vanapu vakiko veya, Ndumbu walunga Branham?” Ngwahono kutachikiza. Naumwe pimi natachikiza. Etu natuzachila ulwilo wetu na woma na kuchikima.

136 Oloze enu namupwa vakulinunga na Kalunga. Kachi muchima wove kawechi nakuliveta hamwe na Mbimbiliya, kahajino kulichuma chimwe chinahenge, kuli chuma chimwe chinahenge. Numbathuhu liuka lyove nalihanjika ngachilihi, ove kawechi kuhasa kuya nachizeko. Ove watele kuya na kuhanjika cha Kalunga. Ou ukiko Mukanda ove naukaya nakukusopesa nawo, eyi Mbimbiliya. Twama nayo!

137 “Mamalelo,” enu ngwenu, “chamwaza, Vanangu jimika mu Ljina lya Yesu.” Echi chakwoloka, eyi yili Mbimbiliya. Oloze kachi nge chiyoyelo nachitambukila hamwe, kaha kacheshi kukukafwa enu kukuhona kujukimika.

138 Enu ngwenu, “Chamwaza, Ngunatambula Shipilitu Wajila.” Echi chamwaza, omu mukiko enu mwatela kulinga. Oloze kachi nge chiyoyelo kacheshi muzeko!

139 Anukenu, mwila weji kutambulanga ngolo jojimwe jili nakuholokela hatiliku nakuyilingisa kukula, nakulinga mwila kutambakana, nawa. Uze mwila wamwaka kwimana hwaku nakuwahilila nge omu tiliku eli. Chize chakwoloka, kuyoyela ha chiyoyelo chochimwe. Kaha mukashili keshi kuhasa kwimana Kumeso a Kalunga, kutambakana nakuhasa, na kuyoya nge Mukakulishitu. Oloze kachi kakweshi chumachimwe

chakuhandunuka mukachi ka muchima! Ikiye akwechi Ngolo jojimwe jakutapula mashipilitu a liyavolo. Yesu ngwenyi ahanjikile ngocho. Ikiye nahase kunangula Mijimbu wawaza chochimwe nge mukakunangula kala. Echi chikiko chika, Yesu ahanjikile ngocho. Eyi Mbimbiliya yinanangula echi. Eyo, mwane. “Chipwethuhu Nanguhanjika mulilimi lya vathu na vangelo, chipwethuhu Ngulinakuhana mujimbu Nanguya na kuhana vyuma vyami vyosena kulivakakuhutwa, Nguli—nguli nalufwelelo lwakututula jipili, Nanguya nakulinga vyuma vyosena, Nangunangula mu Lijina Lyenyi, Nangutapula liyavolo Mulijina Lyenyi,” ikiye ngwenyi, “Nguli wamokomoko.” Shikangaho, ikiye nahasa kulinga echi, kaha “chumachauchi.” Mbata chishinganyeka?

¹⁴⁰ Jino, chuma chakulinga chili, kufuma mumuchima wove, kupwa Vakakulishitu, jino ingilila muchikolo chachindende. Mwomwo, jila yakumbwambuka yakutwaminyina kukulyenga, kaha jimiliyoni na jimiliyoni mukuvula muli chino chisemunuino vakufwelela navaya mu chihela kana. Mwomwo, chikolo chachindende, kaha jila yakupalakanya, ove kaha na Kulishitu wukawenyi.

¹⁴¹ “Jila yakupalakanya eli nakutwaminyina ku Kukuluyoya, kaha vavandende navaya nakuyiwana.” Jino, awa akiko Mazu a Mwata wetu. Yami! Apwile Ikiye nakulinga ika? Kwimana kuze, kutanga vishinganyeka vyavo.

¹⁴² Kaha ikiye ngwenyi, “Ikiye Mukulwane wavandemone. Chamwaza, kaha Ikiye mwapwa ngachilihi Kalunga? Ikiye apwa Muthu! Echi chinyingi chafuma kulihi?” vakiko vahanjikile muize mbongi Yenyi Ivene.

¹⁴³ Nge ove nautambuka nakuya mumbongi hano, echi chinasoloka nge. . .Kangweshi kuhanjika echi nge nakuhona kulemesa vathuko; enu muli Vakakulishitu, enu mwanguzanga yami. Enu tambukenu nakwingila muno mumbongi, kaha echi chinasoloka nge ngolo ja Satana jeji kukuveta nakukulimbwisa. Chino chihela chili chakupaya. Ino mbongi ili yakupaya.

¹⁴⁴ Nyi Billy Graham ahanjikile ika omwo ikiye engilile mu Louisville? Ikiye ngwenyi chize chapwile “chihela cha ngolo ja vandemoni” chize ikiye kanda lyehi amone muchiyoyelo chenye. Vachihakile na mumapapilo, ngwenyi, “Enu munahase kwivwa kushindakana cha liyavolo.”

¹⁴⁵ Eyovene, Ngwachivwile. Mwomwoika? Lino linapu limbo lyami. Omwo Yesu akindulukile kwimbo Lyenyi Ivene, Ikiye ngwenyi milimo Yenyi kayazachikileko kuze, mwomwo ya kuzeneka kufwelela. Ngwenyi, “Kapolofweto kalemena, mukakunangula, mwimbo lyenyiko—mulifuchi lyenyiko, mukachi kavathu jenyiko.” Talenu? Enu kamweshi kuchikafwa echiko, echi Chisoneka chahanjika ngocho. Talenu?

¹⁴⁶ Jino, omwo enu namutambuka muli ino mbongi hano! Kaha kanda kungulweka Yami nge kangwatachikizako. Nangutambuka nakuya kuli vathu na kulimeneka livoko lyami na kuhanjika, “Mamalelo, Ndumbu walunga Branham, Ngwakuzanga.” Kaha munatachikiza echi chinapu makuli! Munatachikiza chinapu makuli. Kachi Kalunga nahase kungulweka kutumbununa chamumuchima, mwomwoika Ikiye mwahonene kungulweka chize?

¹⁴⁷ Punduvane, kaha haze vene mukachi kavathu vove muno vene mumbongi! Omwo vakiko navakumona ove, ngwenyi, “Chamwaza, munatachikiza, ngwamono kuze kuli munganji mukananga . . .”

“Kuli? Kwapwile kulihi?”

“Kuze . . .”

“Haa! Etu tunatachikiza uze lunga!”

¹⁴⁸ Enu namwivwa echi. Echa ngumilweke, enu namwecha mthuumwe kwiza kuzuvo yove uze kakuzangako ove chikuma, kutwama muzvo yove chindende na kwivwa chize kwivwa chize chachipi. Vulisa chize kapapa fwoteni sauzande jino, kahajino enu namuhasa kutachikiza ocho Ngulinakuhanjikaho. Kaha enu namuya muchihela kuze muthu wosena mwakuzanga ove, chize kwivwa chakukutambukisa, hazevene, mamalelo, yami, kaha enu munahase kaha kutwama kuze hayamyaka na myaka, talenu. Mukiko vene, shipilitu yacho. Kaha vathu kavatachikiza hichuma muka, vakiko veji kulikomokela mwomwoika vathu vanalipihisa.

¹⁴⁹ Chuma muka cheji kulingisanga pwevo apwenga wamwaza, chuma muka nachilingisa pwevo wamwaza kuvwala uvalo wakasautu na kulovoka nakuya? Chuma muka, chipwe holili jino nge kanatutu, vavandende vanyike vwapwevo va myaka sikisiteni, na uvwalo wangachize kuuvwala kumeso anaye, kaha kulovoka nakuya mujila? Chili mwomwo, keshi nge uze mwana (keshi nge uze mwana nahono kutachikizako), oloze mwomwo vakakunangula mu kamenga vanahono kukwachilila kupwa hakamenga. Echi chilivene chakwoloka. Punduvane. Pwevo kuya mujila, kaha nauvwalo wausunda na vyuma vyangocho, kaha vakashili kutala hali vakiko kaha vakiko kavatachikijile nge uze unapu mulonga makumbi eyi osena akuyoya na uze muthu. Yesu ahanjikile ngocho! Yesu ngwenyi, “Wosena mwatala hali pwevo nakumufwila mumuchima wenyi, hazevene nalingi nenyi ujila naikiye mukachi kamuchima wenyi, kaha mwakaya nakukumbulula halikumbi lize lya kusopesa.” Chikolo chachindende, kaha jila yakupalakanya!

¹⁵⁰ Ngunatachikiza enu mulinakushinganyeka nge ngumuthu wamakalu. Kangweshi wamakaluko! Nguli ngundumbwenu, kaha Ngwamizanga enu.

¹⁵¹ China ndombo eyi eli nakwiza! Yako kukulusu na kulila palanga na muchima wove unazale na Shipilitu Yenyi, uze mwaya nakumwalumuna kufuma kuli vyuma vyosena vya mukaye, na kutambuka mwa ukalunga kumeso Eyi, na muchima wove uli nakuwema hali Ikiye. Zangi! Keshi mulimoko. Kulishitu keshi ikiye mulimoko, kuzachila Kulishitu, chikiko zangi yakumuzachila Kulishitu. Echi nachikunwa ove, kukulingisa ove, palanga na kuveta chachiyoyelo chove kuliveta na Ikiye. Mukiko ove unahase kumona shili.

¹⁵² Kaha Ikiye alilile hamavu. Echi cha munyengetesele Kalunga mumakumbi a Nowa, omwo Ikiye amwene michima yavo. Kaha Yesu atwamine hapili, kaha ngwenyi, “Yelusalema, Yelusalema, kangahi Ngunafwila kukuuchijeka ove, oloze ola yove ineza kaha zuvo yove yinasale yaupolongwa.”

¹⁵³ Shikaho mukiko nachikapwa naha Kwiza cha Mwana Kalunga, michima yavakakufwelela va muchano yinahokoka. Ikiye ali nakumona hano vene nge kwatela kupwa kuhizumuka kukomba mulifuchi. Kaha echi nachipwa ngachilihi mukachi ka lizavu lya vakakuzeneka masevo? Nachipwa ngachilihi, omwo vakiko vali vakupaishiwa kukuputuka?

¹⁵⁴ Ou Wangana wa Kalunga uli nge muthu nate lyoji mukalungalwiji, kaha, omwo ikiye alikokele, ikiye apwile tupeza, va suwangongo, manoka, vimbotwe, na vaishi nawa. Kapwile cha ikiye kusakula hiya, ikiye alimbilile lize lyoji mumeya. Mukiko muweji kulinganga Mujimbu wamwaza nawa. Mukiko Billy Graham, Oral Roberts, nayami, na vosena vakakunangula vase veji kunangulanga Mujimbu wa mwaza, veji kutanga kaha, nakulihakamo, “Vakiko ava, Mwata.” Oloze ika etu tuli nakulinga lwola lwosena? Etu tunawane nge, shimbu kanda ove ukinduluke cheka, vakiko hazevene vanalovoka lyehi nakukinduluka cheka muchijiva. Chuma muka echi? Kukuputuka, apwile kapeza. Chize kachamwalumwineko, kumukwata mulyoji lya Mujimbu wamwaza. Ikiye apwile kapeza kukuputuka. Ikiye apwile suwangongo kukuputuka. Ikiye apwile linoka kukuputuka. Ikiye apwile mukakulyonga shimbu kanda ezenga nakwingila muliuka. Ikiye apwile na kufwila ko kwecha kunwa wala na kusekasana chakwonga, na kunwa makanya na kulyonga, na kwiva. Ikiye ejile kaha nakwingila mwomwo ikiye apwile nawoma wa hetese. Enu muli nakulingisa kupwa wakutelamo chikupu, nge naulinga ngocho. Ou ukiko muchano. “Chikolo chachindende, kaha jila yakupalakanya, kaha vavandende navaya nakuyiwana.”

Echa tulombenu.

¹⁵⁵ Mwata, mamalelo, nguhehule, Mwata. Eseka mulonga wami hanovene jino, Mwata. Kanda wecha yami ngwizenga kuchisopeselo Chove, hanyima yakunangula muli eyi jila. Mamalelo, kachi muli chuma chimwe chakuzeneka kutoma muli

yami, Mwata, chifumisemo, ngwalembe! Etu twamono likumbi eli tuli nakuyoyelamo, omwo malunga na mapwevo vaneza nakupwa vakunjinjila. Vakiko vanevu sonyi. Ove wahanjikile lwolalumwe, “Kakwechi numba sonyiko mukachi kavana vamaapwevo mu Zeyone.” Vakiko kalemesa vanakafumisako palanga vakiko kaveshi numba nasonyi chekako. Ove Mwata, shinganyeka hali echi! Kaha tunatachikiza nge lwola luli kulutwe luli nakukuma, munyutu kaha mokomoko yivali chipwe kuhakilaho, kaha chize kulyeka chachinene chili nakwiza, kahajino echa ou ali wamajilo natwalileho kupwa lika wamajilo.

¹⁵⁶ Kalunga, tutonese etu vosena chimene chino. Tunganjange, Mwata! Etu tuli nakumona vinjikizo kusoloka. Etu tukwechi meso etu akusokoloka kutachikiza echi. Etu twamono jimiliyoni, na jimiliyoni, Mwata, vaze vanatalisa nyima nakuya kweka. Ngwalikomokela, chuma muka nangulinga, chuma muka Ngunahase kulinga, Ove Mwata? Kuli chumachimwe, Mwata? Kachi echi chinatondeka kwambulula, namalombo amavulu, navyuma vyeka vyavivulu, ngukafwe yami, Mwata, mangana Ngunehe ou Mujimbu kuli vathu. Ngwatela Ngulinge ngachilili? Oloze vakiko valilika Na kuukana lwolalwosena. Ove weji kulinganga vinjikizo Vyove vyavinene na kuzata vikomwesa, oloze vathu veji kuyanga lika. Echi chinapu nge Chisoneka Chove chatela kuzalishiwa, elu lunapu lwola kana “Naumwe muthu mwahasa kwiza kuli Yami kuvanga Tata Yami namukoko, kaha vosena Tata nanguhane Yami naveza kuli Yami”? Mwata Kalunga, tuhane chimene chino mangana vathu vayenga nakutona na kumona echi chinjikizo chamakumishilo hano hamavu. Ngwalombo, Kalunga, ngana Ngwetu uhane chumachimwe kuli vathu.

¹⁵⁷ Kisula ava vathu vavandende hano chimene chino. Kalunga, putuka na Ndumbu walunga Neville, Mwata. Hindula mujimba wenyi. Ikiye ali nakuviza chimene chino, Mwata, kukola mujimo. Ngwalombo nge livoko Lyove lya kuka naliya nakupwa hali ikiye. Sangumuna mwono wenyi.

¹⁵⁸ Kalunga, yako mukachi kachi kachikungulwilo. muli malunga na mapwevo vanatwame muno vaze pamo Kangweshi kahasa kavamona chekako palanga lize likumbi ku chisopeselo, kahajino Nangukaya nakwimana nakukumbulula. Oloze Ngunatange Lizu Lyove, “Chikolo chachindende, kaha jila yakupalakanya, kaha oloze vavandende kaha navaya nakuyiwana.” Ove Mwata, echa echi ngocho “vavandende,” vamwe mulivakiko, Ove muya, Mwata? Kuhana echi kuli muthu wosena hano.

¹⁵⁹ Ngwalombo nge omu muthu kaha natela kulomba. Mwata, ava vathu navaya nakulinga kalachuma hali yami, mwosena mwakungukafwila yami. Kachi Ngwapwanga nazala, vakiko navaya nakungulisa yami. Kachi Ngwatonga uvwalo wasuti, vakiko vanahase kuulanda. Vakiko vanahase kuya hamwe na

kungulanjila yami motoka, mangana ngunangule Mujimbu wamwaza. Vakiko vanahase kulinga kalachuma mukala jila. Ove Tata, hehula myono yetu chimene chino, twalembe linga, kaha echa vakiko vachihehule echi kumeso Ove. Ngwahono kutachikiza, Ngwafwelela nge wosena mulivakiko ali waku Sakula. Kaha haka nayami muze, nawa, Mwata. Kaha kachi kuli kala mulonga muli yami uze naulingisa Yami kuhona kupwako, Mwata, Ove solola echi kuli yami, Nanguya nakucholola hano vene. Ngwatondo kupwa wakukunyuka, Mwata, nge hachize chimene nakukaya nakupwa ukalu kuze kukalwiji. Ngwatondo kuya mulize likumbi. Kaha Ngwahono kutachikiza omwo nachikaya nakupwa, pamo liliko lelo. Shikangaho, ngukafweko yami kutachikiza, kafwa ava vathu kutachikiza.

¹⁶⁰ Kaha omwo etu natumona michima yetu kuhona kuhakako muchima! Mamalelo, etu tuli nakuwahilila ha Mujimbu wamwaza kuwivwulila muvisaji, mokomoko kuya kuliuka. Etu twasakwilila ha Mujimbu wamwaza. Etu katwalizaminyine kuhanjika cha Yesu kumwe. Oloze, Mwata, shili yinapu chiteli kuli etu, kaha yeji kuneha masoji mumeso etu, kukemenena na kulia kaha kwimanyina nakole hali ikiko, vyuma vyosena, unyengwe unazate mumbongi? Mwata, echa Kangelo ka Kalunga amone echi halietu, kaha etusoneka lusona. Tuhanecho echi, Mwata.

¹⁶¹ Chipwe ngocho twaya, Mwata Yesu, jino na kutuwahisa michima yetu, nakutuhana etu vinjikizo vya muchano Wove nge Ove uli mukachi ketu, mangana etu tutachikize nge etu tuli nakutambula—nakutambula chinjikizo chamakumishilo shimbu kanda makumishilo achino chisemunuino.

¹⁶² Kaha etu twamono kuhona masevo, omwo mathu ali nakuyoya mulifuchi kaha ali nava kamba vakusemuka kufuma kumalunga java kwove, kaha—kaha vanyike vama pwevo mujila, kaha jhandulendi vaseze mashikola hamwaka hamwaka na vanyike kupwa visemi vama pwevo, kaha kakweshi kalemesako, kaha omwo mapwevo vaneza nakupwa ulembe, vavene, ha kunwa makanya na—kunwa wala, na visaji vyamivwimbimbi na vyangocho vize vili kwenyeka vishinganyeka vya vana. Ove Mwata, evi navimana mbwe nakulihi? Kaha Ove, Kalunga Wajila!

¹⁶³ Ove Tata, Nguli—Nguli nakwivwa chuma chimwe chaungeji lelo nge chumachimwe chatela kulingika washi washi, Mwata. Kangwatachikijileko nomu mwakuhanjikila, oloze Ngwalombo, Mwata, nge Ove nauya nakuhaka ha michima yetu vyakulinga. Tuhane evi vyuma, Mwata. Etu twavilombo Mulijina Iya Yesu. Amena.

¹⁶⁴ Ola yinahete lyehi. Muthu wosena wamangana ou ukwechi kushinganyeka, natachikiza nge chumachimwe nachiya nakusoloka. Kakwechi numba muthu ali muno muzuvo, uze

ali navishinganyeka vya kwolokako, oloze natachikiza nge aka kaye kakeshi kemanako mwishi ya echi chiyoyelo.

Etu katweshi kuhasa kwimanako, masepa. Kakweshi chuma chimwe, nge kafunga kenu kaha ndumbwenu walunga nawa, kakweshi chuma chimwe chize Ngunahase kutwaminyina enu kumitwala chimene chinoko shina kuli Yesu Kulishitu. Kakweshi chuma chimwe nge omu Ngwatachikiza. Kushinganyeka kaha chumachimwe chize vapolofwetele kwiza shimbu kanda Kuhukula chizenga, vyuma vyosena evi Ngwatachikiza vinazachiwa vinazalishiwa.

¹⁶⁵ Ove ngwove, “Ngachilihi lusona lwa chisuma?” Chize nachikeza mulwola lwa makava aze kanda apwengaho lyehi. Eli Liuka linayi lyehi jino. Vakiko kaveshi kukapwa nalusonako, vakiko vanayi lyehi, talenu. Chize kuhaka lusona chiliko holyapwa jino. Chize kuhaka lusona chili nakusoloka, katachikijilo. Chinyina kuli Kalunga, chinyina kuli Ikiye washi washi!

¹⁶⁶ Ngwahono kutachikiza chimene chino, shimbu tuli nakuvandamina hano mumunyutu kaha. Kaha Nguli nakwivwa nge ove muchilinga. Nguli—Nguli nakwivwa kwivwa chenu, umwe muli enu kweseka kushinganyeka, “Ove Kalunga, nguhehule nakusolola!” Eyi ikiko jila Ngulinakwivwa, nawa. Nguli nakutachikiza nge eyi Mijimbu yangachize, sepa, kayeshi yapuho mukachi kavathu. Enu namuvapaisa vakiko kaha enu namuva- . . . enu—enu namuvalingisa kaha kupwa mwishi. Muthuumwe atela kulinga ngocho. Ngunashingayeka kachi chapwanga ngocho pamo muthuumwe kumwe. Oloze kachi echi chinaholokela hali yami kuchilinga, kachi ngwapanga pwevo wamajilo, echa nguwafumise. Kachi Ngwapwanga . . . Ndavichi ngwenyi, “Chinawahe kupwa chisalo chahachikolo mu Zuvo ya Kalunga, kuhambakana kutwama mumbalaka na shili.” Echi chakwoloka. Kalachosena ocho Kalunga natondo ove kuchilinga, chilinge. Kanda kupwa nasonyiko. Kachi kuli . . .

¹⁶⁷ Kaha, anuka, Ngunatachikiza echi chili chuma chachinene. Namuhanjika, “Ndumbu walunga Branham, ove ngwove myono eyite kaha ikiko navaya nakulwila?”

¹⁶⁸ Kangwatachikijileko vangahi navaya nakulwila, Kangweshi kuhasa kumilwekavoko. Oloze Nanguhanjika chuma chimwe: vakiko navaya nakupwa vavandende, mulikumbi nge ngana eli. Shinganyeka kaha, mulikumbi lize kuze Ikiye apwile, vangahi valwilile. Shinganyeka mulikumbi lya Nowa, kaha mulikumbi lya Lote—Lote, na vosena, Ikiye ngwenyi, “Mukiko nachikapwa nahakwiza cha Mwana muthu, mwomwo, chikolo chachindende, jila yakupalakanya.” Mwamono, yakuyamo ove ukawove, na Ikiye, kaha mukiko kunahu. Talenu? “Kaha oloze vavandende navaya nakuyiwana.” Vangahi vakakufwelela nge Mujimbu wamwaza wapwa Muchano? Yesu Kulishitu ahanjika

ngocho, “Vavandende navaya nakuyiwana.” Vavandende kaha. Pwako umwe wavaze vavandende. Ngunatachikiza nge chachikalu, echi chili chachikalu chikuma. Kaha echi cheji kunguyanjiwisa yami chikuma hakuchihanjika, kwivwa zangi yauthu hali enu, oloze zangi ya Kalunga yeji kungulingisanga yami kumilweka enu.

¹⁶⁹ Jino, ou Shipilitu Wajila youmwe uze azachile mulikumbi lya Apalahama, azachile nawa mumakumbi a Kulishitu, ashika kupwa nakuno nakulinga chuma chochimwe. Ikiye ali hano. Jino, kachi Ngunamilweke enu Muchano, Kalunga ali wakukashiwa kuli ou Muchano.

¹⁷⁰ Kachi Kangwalama mazu amiko, Yami kangweshi ngumuthu wa lizu lyamiko. Kachi ove kaweshi kulama lizu lyoveko, ove kaweshi umuthu wa lizu lyoveko. Jino, Ngunahase kukushika ove chumachimwe kaha Nanguhona kuchilinga chize, oloze—oloze Nangwiza nakukulweka ove. Kachi Nguli namukuli wachuma chimwe nayove, kaha nangukuswekela ove, Yami ngukamakuli. Kachi Nangwiza nakukulweka ove, “Nguli namukuli naove, oloze Kangweshi kukufwetako, oloze Nangulinga mwosena Nanguhashila kulinga,” kahajinoove mungukonekela na kungukafwa yami. Talenu?

¹⁷¹ Etu vosena twatwama na mukuli na Kalunga hachuma chimwe. Etu tuli na mukuli na Ikiye muchiyoyelo chetu. Echa tupwenga vakushishika hali echi. Tambuka nakulovoka na kuhanjika...Kanda kuhanjika, “Chamwaza, jino tala, Yami—Yami ka Pulishiteliyani. Yami ka Mesondisiti. Yami ka Pendekosita. Yami Liuka lya Kalunga. Yami ka Nazeleni. Yami ka Pilgrim Holiness.” Kanda kushinganyeka nge! Nakukapwa jimiliyoni javaze vali muhetese. Ove wapwa Mukakulishitu, muli Kulishitu.

¹⁷² Vangahi navaya nakuhanjika, “Ndumbu walunga Branham, ngwanukeko yami mukulomba jino, Ngwatondo kukatuka?” Kalunga akukisule.

¹⁷³ Mwata, Mwamono mavoko avo. Ola yino hano, ou Shipilitu Wajila wamunene nengilamo muno muzuvo chino chimene. Ngunamono Meso Ove. Ngunatachikiza nge Ove uli kaha hano nakuvumbika Lizu Lyove, “Yami Mwata ngunatumbu, kaha Nanguya nakutukumwina halikumbi na ufuku, kuchina umwe mwavavunyamo mulivoko Lyami.” Ove watumine Lizu Lyove lizate pungu, kaha Echi nayiya—Echi nayiya nakulinga ngocho, Mwata. Echi Chisoneka chahanjika ngwacho Ouve yove zau na lelo, na hayamyaka.

¹⁷⁴ Vakiko kavahashile kufwelelako, ava vathu mumakumbi Ove kavafwelele nge Shipilitu Wajila apwile muli Ove ko. Kaha Ove walilingishile ove Lyavene (kupwa Muthu) Kalunga, ou, Ove wapwile Mwana Kalunga wakusemuka kuli mujike uze ejile hamavu nakusokola etu kufuma mushili. Kaha mwomwo

vakiko vanamono Shipilitu ya Kalunga muli Ove, vakiko vesekele kuchilingisa mweka. Kaha Ove wavalwekele vakiko, Mwata, “Echi keshi Yamiko ngweji kuzata evi, ali Tata Yami atwama muli Yami. Ikiye eji kuzatanga. Kachi enu mwasanyikile Apalahama kupwa ‘senu.’ Apalahama amwene likumbi Lyami.” Punduvene, ikiye alingile, omwo ikiye apwile nemana kuli Ikiye, amumwene Ikiye kuzata mulimo na vinjikizo. “Ikiye amwene likumbi Lyami na kuwahilila.” Ngwenyi, “Enu mweji kuhengesa, hakuhona kutachikiza Chisoneka chipwe Ngolo ja Kalunga, omwo Kalunga ahashile kuwuva uze mujike, na kuneha Mwana (wakusemuka kuli mujike) na kutwamamamo Lyavene mukuzalilila cha Ngolo Jenyi, muli uze Lunga umwe.”

¹⁷⁵ Kaha omwo Ikiye ahashile kumbata Manyinga oamwe kufuma mu Mujimba uze ahanyine Ikiye kupwa Mulambu, na kujilika vathu vaze mangana Ivane ayoyelemo, nakutwalilaho kuzata milimo Yenji nakumakumishilo akwenyeka! Ove Kalunga, hindula vathu nakumona echi. Tuhanecho echi. Lwila voseni ou nazundula livoko lyavo. Kosa michima yavo. Mwata, mavoko ami ali helu. Ngukose, Ove Mwata. Muno mukiko muzuvo yakulyolola. Muno mukiko muchihela etu twatela kupwa vakusanyisa. Echa ou Shipilitu Wajila atu kose etu chimene chino, kaha tukose etu kufuma kukupola.

¹⁷⁶ Etu twalombo, Mwata, kanda nakuya na kupwa muthu umwe kufuma kuno oloze azale na Shipilitu Yove. Pamo kakweshi kupwa umwe mwapwa na kwivwa chakufuma kuweluka omwo nayisoloka. Oloze, Mwata, yako mukachi, koka nakufumisa chiyau na kutulweka etu omwo etu twapwa, Mwata. Tuhanecho echi. Kahajino tuzalise na Shipilitu Yove, na muchima uze uli wa muchano kaha nawa utoma. Kaha muli elu lwola lwakuyajisa na vyeseke vyavikalu, Ove muya nakukola na kuyema nakuwaha kulietu shimbu tuli nakutambuka nakuya, kuvandamina lize likumbi. Shimbu masoji alinakuhita kumakili etu, ha shili ja mumbongi, pamo ou Shipilitu Wajila ali nakutala nakuhanjika, “Kuli umwe Ngunahase kuhaka lusona, ikiye Wami, ikiye ali Wami.” Tuhanecho echi, Mwata. Pamo echi vanahase kuchiwana mukachi ketu lelo. Etu twachilombo echi mu Lijina lya Yesu. Amena.

Omwo Nangukeza kukalwiji mulikumbi lya
makumishilo,
Kaha kuhuwa chajipeho jaushona
jamakumishilo;
Kuze nakukaya Muthu umwe kuvandamina
uze mwakangutwaminyina yami jila,
kangweshi kahasa kuzauka Yotane
ukawamiko.
Kangweshi kahasa kuzauka Yotane
ukawamiko,
Yesu afwililile ha jishili yami nakungutomesa;

Omwo Nangukamona milima, Ikiye mwakaya
 nakunguvandamina,
 Kangweshi kuhasa kuzauka Yotane
 ukawamiko.

¹⁷⁷ Ngwatondo kutachikiza Ikiye Jino. Mbata livoko lyami, Mwata wamwaza, ngutwaminyine lika, echa yami ngwimane. Echa yami ngwimane hano, Mwata, kwimanyina nakole kalachuma vanavuluka kupwa chakuhenga, kalachuma chinasoloka kupwa chakuhenga. Kangwazakamako vyosena kala muthu mwahanjika, echa yami ngwimane, Mwata. Nge Ngwakumisa vyosena Nguli nakulinga, ngukafweko ngwimane. Mbata livoko lyami na kungukoka, Mwata. Linga chumachimwe, echa ngwimane. Omwo vyuma kana naviza, kaha upite wamukaye na vyosena na kutohwa chacho na upahu wacho; fwika meso ami kuli echi, echa yami ngumone kaha Ikiye Uze afwile hali yami. Kachi echi nachikwata hali sepa Ngulinenyi, kachi echi nachikwata havyuma vyosena Ngukwechi; echi kacheshi kupwa nachuma chimweko, Ngwavihane vyosena kukamenga. Echi chikiko, echa yami ngwimane wakushishika. Kaha muthu umwe omwo kuhwima nachihuhuwa kumeso ami, kaha Ngunatachikiza nge muchima wami unayi lyehi kaha makumbi ami nakumu, kaha lwola lwami lunahete kaha kati yami vanayimbate kufumisa hamukana, Ngwatondo kuzuuka Yotane ukawami. Ikiye mwaya kuze. Yaah. Omwo Nangukamona milima, Ikiye mwakaya nakunguvandamina yami kuze, Kangweshi kuzauka Yotane ukawamiko. Kachi Nanguya nakumwimanyinako Ikiye jino, Ikiye mwakangwimanyinako. Nanguya nakumuyoyela Ikiye Uze afwile hali yami, kaha chiyoyelo chami nachikawaha ngachilihi. Omu mukiko mujila Ngwatondo kwimana.

¹⁷⁸ Ngwashinyeka kuli vathu vali nakuviza muno. Ikiye ahananga makati? Ngwavulyamanga. Vakiko vahananga makati? Kulihi makati amwe munahane? Kalamuthu ali na makati? Nduma.

¹⁷⁹ Yami nguli nakuvandamina hali Shipilitu Wajila. Kachi ove naufwelela kaha, pwako kaha nalufwelelo, kanda kukakasana. Kachi Kalunga mwaya nakuchisola kuli yami umaukalu. . . Kala chuma kana, Ngwahono kutachikiza; kachi ove naukalu livoko lyove, ove kawangutachikizako yami kaha Kangwakutachikizako ove. Kahajino kachi Kalunga mwaya nakuchisola hano, ove unahase kufwelela echi kupwa Kangelo youmwe ou anehele Mujimbu shimbu shimbu kanda kwenyeka chipwenga kuze, ou mwapwa Kangelo youmwe uze mwauneha jino shimbu kanda kwenyeka chikwavo. Ove muya nakufwelela echi? Kachi ove muya, katula livoko lyove. Chosena chakwoloka. Chosena chakwoloka, echa Mwata etu hanecho echi.

¹⁸⁰ Ikiye natwame hakamwihi nayami. Kuli mukwavo weka natwame hakamwihi na yami, ikiye Pwevo lya Snyder hano,

mokomoko ou Pwevo Iya Murphy hano, lijina Iyenyi lika, natwame hanovene. Ngunavatachikiza vakiko.

¹⁸¹ Ngunahono kutachikiza ou lunga, ikiye ali ngeji kuli yami. Oloze Kalunga namutachikiza ikiye. Kachi Kalunga mwaya nakusolola jino, vangahi muli enu vanatachikiza nge kacheshi. . .

¹⁸² Kanda kutala hali Yamiko. Yami, Ngumuka Kentucky hillbilly, nge omwo ngwatachikiza. Kangweshi—Kangweshi nashikola yakutamo, kuhona, na—na kusoneka lijina Iyami. Oloze kuli chuma chimwe Ngunatachikiza, Ngunamutachikiza Ikiye. Kaha ngachize, mukiko—mukiko vyosena kaha Ngunatachikiza. Jino, kanda—kanda kuhaka mangana kuhanjikiso yami.

¹⁸³ Kaha ove unahase kushinganyeka nge kutangisa chami chimene chino chafumu mujila na muvyuma vyosena, ove linunge na Mbimbiliya lwola lumwe na kutala nge ove kaweshi wakwoloka na chumakana. Talenu kachi nge kujindama chove kacheshi nge omwo ove—omwo ove muhakaho. Kanda kuchihaka hamwe na chishinganyeka choveko, oloze chihake echi na ocho Ikiye ahanjika. “Chikolo chachindende, jila yakulipalakanya, kaha vavandende kaha vakiko navaya nakuyiwana; ’mwomwo jila yakumbwambumuka yili nakutwala kukulyenyeka, kaha chikolo chachinene, kaha vavavulu navaya nakwingila muchihela kana,” jimiliyoni na jimiliyoni najiya nakwingila muze. Umwe hali miliyoni mukiko jila pamo nayihasa kwiza. Ove jino oho. Mukiko Ikiye ahanjikile. Jino, Ikiye kahanyine nambalako, oloze Ikiye ngwenyi, “Nge omu chapwile mumakumbi a Nowa, mwono eyti. Nge omu chapwile mumakumbi a Satome, vatatu.” Kufuma muchuma chosena, vatatu kaha valwilile, kuhita mukahya. Shikaho nachiya nakupwa ngachilihi!

¹⁸⁴ Jino, kachi kalamuthu ali mukashipilitu, Ngwatondo enu mutale hali ou lunga natwame hano, ikiye natale hali yami swi nge omu nahashila. Akatulanga livoko Iyenyi, Kangwamwijiwako ikiye; kanda Iyehi ngumumone ikiye, kaha Kangwatachikiza nachuma chimwe hali ikiyeko. Ikiye natwame kaha hano na kutala hali yami. Oloze, ikiye ali nakuli wana, ikiye ali nakulomba. Jino, echi chakwoloka. Jino, kachi nge Mwata mwaya nakungulweka. . . Uze lunga natwame kuze kufuma kuli yami, kaha echi chikiko kuliwana chetu chakulivanga, kaha ikiye natwame kuze. Kachi Mwata mwaya nakujimbula kuli yami Omwo ikiye—Omwo ikiye. . . Kangweshi—Kangweshi kuhasa kuka ikiyeko. Kangweshi, Kangweshi kuhasako kulinga echi, ’mwomwo Kalunga nalingi Iyehi echi. Oloze echi nachiya nakukulisa lufwelelo lwove. Kala muthuwosena jino talenu, Ikiye alihano vene, Shipilitu yoyimwe kaha. Kaha anuka, Yesu ashikile evi, shimbu lwola lwamakumishilo. Echi chinapu lwola lwosena kupwa chinjikizo chamakumishilo.

¹⁸⁵ Likumbi likwavo, Leo na Yami twapwile twatwame mujila, kaha vamwe mulietu kuhanjika. Kaha Ngulilika nakwivwa nge kulikwalumuka chili nakwiza, kaha kwalumuka chili nakwiza. Omwo etu twahanjikile hali echi, echi kacheshi kuhasa kuneha kwalumuka mumulimo wamiko, 'mwomwo echi kacheshi kuhasa kupwako chekako, oloze nachiya nakupwa kwalumuka kuli yami. Ngunapunga lwolalwosena kupwa nakwivwa kuseyaseya na kwecha vathu vangutwaminyine yami na kungutwala yami, na kutuma *eyi* jila na *ize* jila. Kachi nganahase kulinga chuma chimwe kaha Mwata nangulwekecho yami kuchilinga lwola lwakunyima chikuma, Kangweshi kupwa muukalu ko Yami nguli hano lelo. Yami nanguya nakufumaho uno mulungu kuya nakupwa ukawami na Kalunga. Eyo, mwane. Ngwa—Ngwatela kwivwa kufuma Mwilu. Kangwazangileko kupwa wakuzeya zeya, Ngwatondo kwimana hakukunyuka chami.

¹⁸⁶ Ou lunga, Echi cheji kwizanga lika na lika kutwala kuli ikiye, ikiye natwame haze vene, 'mwomwo ou lunga ali nakufwelela, ikiye ali vene wakufwelela. Nguli nakutala mulikungumbuwa lyosena, kaha Echi chinaholokela hali ou lunga. Ikiye ali nakutonda, ikiye ali nachiteli, oloze ikiye ali nachiteli cha muthuumwe kumwe. Chosena chakwoloka. Ove uli nakulombelela muthuumwe. Ove ukwechi muthuumwe kumwe ha muchima wove. Chosena chakwoloka, echi chakwoloka? Ali sepa. Kachi Nangumilweka enu ukalu muka uli nauze sepa, nauya nakungufwelela yami kupwa ngamba ya Kalunga? Uli kunwa wala. Chosena chakwoloka. Kachi echi chakwoloka, katula livoko lyove.

¹⁸⁷ Ove wafwelelela? Muthumwe ali kuno katula livoko lyove, pwevo ali kuze kunyima, muthuumwe. Eyo. Yaah. Ove kawangutachikiza yamiko? Yami ngungeji kuli enu vosena? Kangwakutachikiza ove ko, oloze Kalunga akutachikiza ove. Ove wafwelela echi? Kachi Kalunga mwaya nakuchisolola kuli yami ocho chili mumuchima wove, ove muya nakufwelela yami kupwa ngamba ya Kalunga? Pwevo wakalemesa wamundende, ukalu wove uli nakukushupa shina uze kemba haze. Chosena chakwoloka. Kaha uze kemba ali nachingongo kumeso eyi. Uze ndotolo keshi kuhasa kulinga chuma chimweko hali echi. Ove uli ngeji hano, ove na wove wakuzanga natwame haze. Ove wafwelela Kalunga nge nahase kungulweka yami ove yove hiya mokomoko okwo ove wafumu? Ove mufwelela echi? Muya nakwitavila kuhinduka cha ou kemba kachi Ikiye mwayoya? [Uze pwevo wakalemesa ngwenyi, "Eyo."—Muka.] Chosena chakwoloka, ove kinduluka yako ku Somerset, Kentucky, kuze ove wafuminyinga. Kaha fwelela nge ikiye mwaya nakupwa kanawa, chingongo chove nachiya nakuzeza ou kemba kachi ove mufwelela.

¹⁸⁸ Omwo Ngwavavulukanga lize lizu, muthuumwe kwimana kunyima kuze muze muzuvo, wakufuma ku Somerset, Kentucky,

kulomba, ali na ukalu wamuchima. Ove fwelela Kalunga mwaya nakukulingisa kupwa wakulikangula? Kachi ove wafwelela na muchima wove wosena, na kufwelela nge Kalunga mwaya nakukuhindula nakukuligisa ove kupwa wakulikangula.

¹⁸⁹ Hano, hano, Ngwafwalela nge livoko lya muthumwe kwiza hano vene, hano vene, pwevo wakalemesa. Yaah, Ngulinamono livoko lyove. Yami Ngungeji kuli ove pwevo wakalemesa? Kangwakitachikizako ove. Etu kanda lyehi tuliwana. Ove wafwelela yami kupwa ngamba Yenyi? [Uze pwevo wakalemesa ngwenyi, “Eyo.”—Muka.] Ove mulingamo? Ove ukwechi chiteli mumuchima wove, mokomoko chumachimwe. Ove wafwelela kachi Kalunga nahase kusolola echi kuli yami, ove wafwelela Echi kupwa Shipilitu youmwe apwile muli Kulishitu? Lunga lyove natwame haze, ikiye afwelela chuma chochimwe, nawa? Nayove muya nakufwelela chuma chochimwe? Echi chili cha mwanaove wamundende wapwevo natwame kwakamwihi na ove okwo. Echi chakwoloka, ou pwevo ali na kansa. Oloze ove wafwelela nge Kalunga mwaya nakumuhindula ikiye? Kachi mwafwelela, imika livoko lyove. Chosena chakwoloka, haka livoko lyove hali mwanove.

¹⁹⁰ Mwata Yesu, Kumeso a Shipilitu Yove, Ngunapaisa ou liyavolo ali nakujiha ou mwana. Ngwahake, ha lufwelelo, Manyinga a Yesu Kulishitu mukachi ka mukkujiha na ou kanyike. Echa echi chiyoze. Amena.

¹⁹¹ Pwenu nalufwelelo muli Kalunga. Kanda kukakasanako. “Kachi ove kaweshi kuhasa kufwelelako, vyuma vyosena vinashiwa.” Kachi ove nauhasa kufwelela, vyuma vyosena vinashiwa. Mukiko vene.

¹⁹² Muthuumwe kumwe kunyima kuze nemika mavoko avo, kumwe, ove, pwevo wakalemesa okwo kusongo. Ove wangufwelela yami kupwa ngamba ya Kalunga? Kangwakitachikizako ove, ove nawa kawangutachikizako yami. Ove wafwelela nge Kalunga nahase kusolola kuli yami ukalu wove uka? Ove muya nakwitavila Yesu kupwa Mukakuka chove mokomoko Mukakuhana, kalamw—kalamwosena...? Ove wafwelela jino? Chosena chakwoloka, kahajino uze kafunguya wapwanga nenyi, ikiye wapwanga nenyi. Kachi echi chakwoloka, imana, kachi echi chakwoloka, mangana vathu vayenga nakumona echi kupwa muchano. Chosena chakwoloka, nauya nakukuseza jino. Ove yako kwimbo na kupwa kanawa. Kalunga akukisule.

Ove wafuma ku Kentucky, nawa. uhu-hu, echi chakwoloka.

¹⁹³ Uze pwevo wakalemesa natwame hakamwihi nayove wakufuma ku kentucky, nawa. Ikiye ali, nawa. Kangwakitachikizako, Ngwakitachikiza numba? Oloze Nangukulweka nge ove ukwechi ukalu umwe uli nawo. Kachi Nangukulweka ukalu uli nawo, ove mumwitavila Kulishitu

kupwa Mukakuka? Ou uli mu tungi yove. Kachi echi chili chakwoloka, imika livoko lyove, helu chikuma mangana vathu vahase kumona. Chosena chakwoloka, yako kwimbo jino, nauya nakukuseza. Lufwelelo lwove lwakulingisa ove kupwa kanawa.

Ngwakulweke ove ufwelele. Ngunakulweke nge pwako nalufwelelo lwa kufwelela.

¹⁹⁴ Hano hanatwame pwevo wakalemesa, ali nakulomba, ali nalilesu kumeso eyi. Kangwakutachikizako. Kalunga akutachikiza. Ove wafuma ku Joliet, Illinois, kaha ove ukwechi liundu. Chize chakwoloka vene. Ove unahase kulikomokela. . . (Eyo, echi echi ou—uze pwevo vanehanga kuli Rosella. Echi chakwoloka. Vandamina, ikiye angulwekanga yami hali echi, oloze ikiye katachikijileko Kangwamutachikijileko ou pwevo. Chize chakwoloka. Chasoloka kaha kupwa lufwelelo lwa lunene.) Nanguya nakukulweka ove chuma chimwe ove—ove unatachikiza nge Kangwatachizako. Ove wapwa nakulombela ou mwana natwame hano kuze kusongo ya chitwamo, ali nakuviza. Ali mwanove. Chize chakwoloka. Amena. Ove watachikiza Kangwatachikiza echiko.

¹⁹⁵ Mukiko Echi chili, Ou ali Shipilitu Wajila! Ove wafwelela Echi? Ove mwitavila echi? Kahajino kachi echi chakwoloka, chize Ngwahanjikanga “chikolo chachindende, kaha jila yakulipalakanya” echi chakwoloka. Yesu Kulishitu, Mwana Kalunga, ali hano vene. Ou Shipilitu wa Kalunga wakuyoya ali hano vene. Enu mwafwelela Echi? Kahajino, mangana ove utachikize nge kakweshi kuka muthu naumweko, Kangweshi mukakukako, oloze Shipilitu ya Kalunga ya sakula kaha yami kulisolola Ivene. Kangweshi na shikola ko. Kangweshi na chinyingiko cha kalachumako. Oloze eli Shipilitu yenyi ikiko yeji kuzatanga evi, mwamono, kaha Ikiye natondo enu mutachikize nge Ngunamilweke Muchano.

¹⁹⁶ Ou ukiko Muchano, nge Yesu Kulishitu mwalingisa wosena muli enu kupwa kanawa jino kachi enu namuya nakufwelela echi. Jino nge omu. . . Kachi Echi chazachiwanga mu Kingston, muze va mishonali, mokomoko kalamuthu kunyima kuze, vachimwene Echi kuzata mu Kingston, masauzande kupwa nakukuhinduka, mwomwoika Echi chinahonene kuzachiwa kuno muno mu America kuze etu tuli nakuzachiwa mujila kana jino? Mwomwoika etu tunahonene kufwelela echi? Mwomwo etu katweshi kuhasa kuzauka uze musetoko nakuya kusali yize. Ove wafwelela echi? Imika mavoko ove.

¹⁹⁷ Jino, owo mavoko oamwe, haka hali owo walihate nenyi, echa yami ngumulombelele ikiye kufuma kuno, kaha kanda ove mukakasanako mumuchima wove, echi nachiya nakukumisa chize.

¹⁹⁸ Mamalelo, yami, Ndumbu walunga Neville! Omwo Ngwazanga, omwo Ngwalombo, omwo Ngwa. . . Ove unahase

kushinganyeka nge Nguli ukawami; Kangweshi ngochoko. Ngunatachikiza hano Nguli vene. Kachi Ngunahase kaha kumbata aka kachuma kakandende nakukuhanako ove! Munatachikiza nge Yesu Kulishitu, Mwana Kalunga, ali muno mukachi kavathu chimene chino, hano vene, ali hano vene, kulisolola Ivene?

Chamwaza, ove ngwove, “Ndumbu walunga Branham, *ove* wahanjikanga chize.”

¹⁹⁹ Kaha Ngwahanjikanga ngachilihi? Ngwahono kutachikiza. Kuli pwevo mukwavo na TB. Ove unahinduka, ndumbu wapwevo. Wakukisula. Nguhilwishileho cheka, ove wapwanga nakulombelela pwevo ali na TB, ’mwomwo ali pwevo wajikambu jajivwi. Yaah. Chosena chakwoloka, fwelela echi. Chosena chakwoloka. Ikiye ali hano. Echi chinapu Kusoloka Chenyi.

²⁰⁰ Jino, Ikiye nahanjika hano, “Evi vinjikizo navika kavanga vaze vakakufwelela. Kachi nge navakanangika mavoko avo hali vakakuviza, navakayoya.” Kaha Ikiye mwalyonga ngachilihi? Talenu, echi kacheshiko hali Ikiye ko, echi kacheshi kuhasa hali yamiko, jino echi chili hali ove. Jino ove fwelela.

²⁰¹ Nguli nakutala hali pwevo wamundende natwame kunyima kuze hano vene jino, ikiye ali nalufwelelo lwalunene. Ikiye na lunga lyenyi vaneza kalinwaha kuli Mwata. Ikiye natwame hano muno muchiwanyino, ali na chuma chinatotoka chize ndotolo ali nakuya nakupula ikiye kunyima oku, kaha kemba yenyi apwanga tele mwasemuka. Kaha uze ndotolo ali nakuya nakupula hanyima yaechi, oloze uze kemba asemukile kaha vakiko kavawanyine uze katuli chekako. Nayi lyehi. Talenu? Mwomwoika? Ikiye atwamine kaha nge . . . Ikiye kapwile kunoko kuno kukamenga nge nganako. Ikiye atwamine kaha kuze kunyima na kufwelela. Echi chakwoloka, Pwevo lya Green, Ngwafwelela mukiko vene, kunyima okwo? Chize chakwoloka. Talenu livoko lyenyi? Uze ndotolo ahonenekuwana chize chatotokele, chinayi lyehi. Mwomwoika? Ikiye afwelelele, atamukile nakuhanjika ngwenyi, “Echi chakwoloka!”

²⁰² Jino enu lingenu mwomumwe, kaha kala ukalu wosena enu mulinawo watela kumiseza. Kalunga, Ou nahase—Ou nahase kutuma Chuma chimwe mukachi kamujimba wauthu, kuli chize chipukupuku cha kusuma chalinoka chize chapwile muchilyachilyo chauze lunga, ulembe, wakumujiha ikiye, kaha nahase kwimika chize na kumujiha hazevene, mwahona ngachilihi Ikiye kujiha misongo mumujimba wove. Mwomwo, uze lunga apwile muukalu kaha ikiye atelele kumukafwa vene. Na ove, nawa. Kachi ove kaweshi kuhasako, ove muya nakufwa.

²⁰³ Jino hakakenu mavoko enu hali umwe namukwavo. Kanda kulilombela ove lyaveneko, ove lombelela owo muthu unalihate nenyi. Echi chikiko Ukulishitu.

204 Linangulenu echi, linangulenu echi, nge, omwo enu mweji kulinganga kuli veka, mweji kuchilinganga kuliKulishitu. Omwo enu namupwa vamwaza kuli kalamuthu, enu mweji kupwanga vamwaza kuli Kulishitu. Kachi enu mweji kuyanjisa kalamuthu, enu mweji kuyanjisa Kulishitu. Mamalelo, yami!

205 Mamalelo, kachi Nanguhasa kuneha echi okwo, kachi Nanguhasa kulingisa vathu kumona echi, ocho Ngulinakutala ho yami na omwo Ngulinakwivwa, kaha nomwo Ngunatachikiza omwo chili nakuya nakupwa, talenu. Omwo Kulishitu ali nakushijika hanyima ya ou Mujimbu chimene chino, kuneha echi mukachi kamichima ya vathu na kutunga chumachimwe muze; keshi nge kuwahilila kahako, keshi nge kwivwa kahako (chili nakwizanachoko), oloze kutunga lufwelelo lwakuzeneka kufwa luze lwakuhona kuhanjika, kuhana numba mwamundende kuli liyavolo.

206 Jino, Ikiye mwaya nakwivwa kulomba chami, Ikiye mwaya nakwivwa kulomba chenu. Enu lombelenu umwe namukwavo jino, shimbu Nguli nakumilombela enu.

207 Ove Mwata, elu lwola lwalunene ngana, etu tunatachikiza nge echi nachiya na kulumbununa chihandwa mukachi ka kufwa na kuyoya, kuli vavavulu. Kaha Ngwachikimanga Kumeso Ove, mwomwo Ngunatachikiza, Mwata Kalunga, nge Ngwatela kulomba na muchima wosena. Ngunatachikiza nge numbathuhu nakupwa pamo vakakuhona kuviza mukachi ketu mu minyutu yikwavo yitanu, kaha muthu wosena hano mwaya nakutachikiza nge Ove uli hano. Hano vakiko vanemana chimene chino, Mwata. Echa vakiko vathu vemike mavoko avo vaze vanatachikiza nge Kangwavatachikizako, kaha kakweshi chuma navakiko ko. Oloze Shipilitu Yove natachikiza vakiko. Munatachikiza vyakusweka mumuchima yavo, omwo Munatachikiza maukalu na kuyanda chavo! Kahajino, Mwata, echa echi lelo, echa echi jino Shipilitu Yove yiyenga nakukwata hamijimba yavakukuviza. Tuhanecho echi, Mwata. Vakiko vali nakulombela umwe na mukwavo.

208 Kaha Ngwalombo, Kalunga Wamwaza, nge Shipilitu Wajila nauya nakulingisa echi kupwa hatoma kuli vakiko, mangana vakiko vayenga nakuhona kufwelela echi cheka. Kaha kuli musongo ukwavo, Mwata, ou uli waunene kuhambakana musongo wakumujimba, uli musongo wakushipilitu. Echa muchima wosena upwenga wakusokoloka.

209 Mwata, omwo Ove wemanyine kuze kusali ya Apalahama, kaha wazachile chuma chochimwe, wamulwekele Sala uze apwile “kunyima” Ove, echi Chisoneka ngwacho, “muze mumbalaka ikiye asehele,” kaha Ove wamulwekele. Kaha Apalahama atachikijile nge nge apwile Elohim, uze Kalunga wamunene. Mumunyutu yayindende Ove wajimbanganyine mumeso eyi.

²¹⁰ Kaha, Mwata, omwo Yesu emanyine kaha nakulinga chumachimwe, kaha ngwenyi, “Enu mwasanyikile Apalahama kupwa ‘senu,’ kaha ohonyi namwamba ngwenu twatachikiza Chisoneka.” Ngwenyi, “Enu mweji kuluwisa, hakuhona kutachikiza Visoneka chipwe Ngolo ja Kalunga.” Kaha vakiko vamuvulukile Ikiye kupwa “Mukulwane wavandemoni.”

²¹¹ Oloze Ove washikile nge mumakumbi akumakumishilo Ove mukaya nakuhingununa Shipilitu Yove cheka kanawa. Ou kapolofweto ngwenyi, “Mu lwola lwa chingoloshi nakukapwa Kumunyika.” Kaha etu hano.

²¹² Omwo ou wakuzeneka chisemi kaye kali nakuchikima mwishi ya shili, nge muthu wakupenda nakutalyangila hembo naufuku, shimbu pimbi mwaya nakutuvika mukachi, kakweshi kuya nakupwa numba lukungu lwa volcanic, kakweshi kusalako chimako, nachikasala ho. Kaha etu twakumona lwola luli nakuhita.

²¹³ Ove Kalunga, fumisa kala kukakasana muli etu. Tuhake etu muchingombela jino. Twaya, Shipilitu Wajila. Emika mavava Ove amanene, uchijeka aka kalizavu kavathu hano jino, kaha echa etu Ove uzalilile mumichima yetu, kaha echa vakiko vatachikize nge Ove uli Kumeso a Ukalunga, nge uli Ove, “Yami Mwata Ou mukakuka misongo yenu yosena.” Kaha echa Kupwa Chove chilinge chumachimwe ku muchima yavo chize nachilingisa vakiko kuya nakufuma hano, chimene chino, kufwelela na vyosena vili muli vakiko. Kaha echa mukakuviza na vathu valinakuyajiwisa kupwa vakuhinduka.

²¹⁴ Mwomwo, nge ngamba Yove, Ngunemana na kupaisa liyavolo wosena, kupaisa misongo, kupaisa na Satana.

²¹⁵ Enu munajimbala, kaha kamweshi chumako shina chihwahwa. Kaha etu tuli nakusanyika livoko lyove chimene chino, mu Lijina lya Yesu Kulishitu. Kaha nge ngamba Yeniyi, kunangula Lizu Lyenyi na kulweka vathu Muchano, nge kupwa vakwoloka nakupwa mukusungama na Lizu lya Kalunga, Ngunapaisa ove, Satana, mu Lijina lya Yesu Kulishitu. Fuma hali vathu vosena ava vanafumu kwakusuku na hakamwihi, vapwenga vakukiwa. Ove mbata kufuma muno mulikungumbuwa nakufuma muli ava vathu. Ngunakutenukila ove hali Kalunga wakuyoya. Kaha eyi Mbimbiliya ngwayo, “Kulomba, cha muthu wakwoloka chili na ngolo jajinene hakuzata.” Kaha malunga vavavulu vakakwoloka vali namavoko kunangika hali vakuviza, chimene chino. Mamalelo, Satana, ove ulinakutonda kuvalingisa kushinganyeka nge yami, mangana umbate upahu nakuufumisa hali vakiko. Oloze lunapu lufwelelo lwavo muli Kalunga, nawa, vakiko vanafwelela Kalunga! Kaha ove muya nakufuma, ha lufwelelo lwavo. Shikaho putukako ungeji wove wakufuma hano, na kuya mumilima muze watwama. Ngunakupaisa ove, mu Lijina lya

Yesu Kulishitu, ha lusesa lwa Mbimbiliya ya Kalunga, hakutuma chami kuli uze Kangelo. Jino yako, mu Lijina lya Yesu Kulishitu, kaha echa vakiko kupwa wakukasunuka. Amena.

²¹⁶ Enu mwafwelela, na michima yenu yosena, nge enu mwahinduka? Imika livoko lyove, hanjika, “Ngunamwitavila Yesu Kulishitu kupwa Mukakuka. Mivwimbimbi yafuma hali yami. Nguli jino nakwitavila Ikiye mukuzalilila cha ngolo Jenyi, mukikisula cha Kupwa Chenyi. Ngunetavila Ikiye.”

Lufwelelo lwami lwatale kuli Ove,
Ove Mukoko wa Kukavali,
Mulwilo wa Ukalunga;
Jino ngwivwulile yami shimbu na Ngulomba,
Mbata na kufumisa jishili jami josena,
Nge chiku yami na nguhungumuka
Kufuma kusali Yove.

Jino echa twimike mavoko etu mukuyema kuli Ikiye jino.

Shimbu chiyoyelo chili mumilima omu
Ngunemena,
Kaha kunyengetela yami chinangujingilika
yami,
Ove Pwako Twamina yami (Ove Kalunga);
Kasa milima kupwa musana,
Hunda maushona, na kufumisa woma,
Nge chiku yami na nguhungumuka
Kufuma kusali Yove.

[Ndumbu walunga Branham naputuka kungunguta
Lufwelelo Lwami Lwa Tale Kuli Ove.—Muka.]...luheto
lwalikoji!



CHIKOLO CHA CHINDEDE LVE59-0301M

(Strait Is The Gate)

KWALA CHA LIUKA

Ou Mujimbu kufuma kuli Ndumbu wa lunga William Marrion Branham, vawambulwile hakuputuka mu Ingilishi ha Chalumingo na chimene, Kuwana 1, 1959, ku Mbalaka ya Branham mu Jeffersonville, Indiana, U.S.A., vanaufumisa mu muzu vakopele ha tepu na kuusoneka mu Ingilishi chakuzeneka kuwalumuna. Echi kwalumuna Lilimi vachinungulwile vausonekele na kuupangila kuli vaka Kukopa cha Lizu Lya Kalunga.

LUVALE

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Tachikizenu lisesa lyakufwatula

Kulama lisesa lya kufwatula. Ou mukanda vanahase kuufwatula kumakina akuvulisa a hembo kupwa wakuzachisa kuli muthu hakapanji kenya mokomoko kuhana kweka, wa wana wakanyombo, kupwa chitwa chakutanjisa Mujimbu wamwaza wa Yesu Kulishitu. Ou mukanda kavatela kuulanjisako, chipwe kuyitunga yayivulu chikuma, chipwe kuyihaka ha peho ha website, kuyitulika muze vanahase kuyifumisa, kulumbununa mu malimi eka, mokomoko kuuzachisa kupwa jila yakutambwilamo mali chakuzeneka lisesa lya kusoneka kufuma kuli vaka Voice Of God Recordings®.

Mwatondo kutachikiza vyavivulu mokomoko vyuma vikwavo, kaha sonekelenu ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org